

景
文
集
五









景
文
集
五

宋
祁
撰



中
華
書
局



景文集卷二十六

奏疏

論以尺定律

〔案〕宋史燕肅言鍾律不調在景祐元年那時直史館遷太常博士

臣聞樂生于音音生于律律定于尺尺成于黍得黍不真尺固不定定尺無準律亦自差而望聲調是南舟泝燕北轅走越愈亟愈遠也故尺短則律從而短尺長則律從而長短者聲清益上長者聲濁益下清濁不得其中而至樂遁矣古者神瞽攷中聲而量之以爲之律所以立均出度也黃帝命伶倫斷竹長三寸九分吹之以爲黃鍾之宮然後制十二律以上下求而聽鳳鳴司馬遷黃鍾之律長八寸七分之一太簇七寸七分之二林鍾五寸七分之三應鍾四寸三分之班固司馬彪說黃鍾長九寸聲最濁太簇長八寸林鍾長六寸應鍾長四寸七分四釐強聲最清蔡邕鄭康成杜夔荀勗等所論尺有增損而黃鍾之宮要以九寸爲定始勗當武帝泰始中校太樂八音不和知後漢至魏尺長于古四分有餘勗乃部署著作郎劉恭依周禮制尺所謂古尺也以古尺更鑄銅律調叶聲韻後汲郡盜發六國時魏襄王塚得古周時玉律及鍾磬與新律聲韻闇同于時郡國或得漢時故鍾吹勗律以合之其聲皆應時人稱爲精密惟散騎侍郎陳留阮咸譏其聲高聲高則悲非與國之音必古今尺有長短故也武帝以勗律與周漢器合

遂施用之。後始平掘地得古銅尺。歲久欲腐。不知所出何代。果長跖尺四分。時人咸服其妙。而莫能措意焉。跖立千載之下。推百代之法。度數既合。聲韻又諧。亦可謂密切而有證也。而時人掘地之一尺。破周漢之二器。亦近夫貴耳賤目也。隋時始用木尺律而定律呂。鑄壞前代金石。以息物議。惜其制度文議沒于江都。無聞焉耳。是時尺有十五等。一、周尺。二、晉田父玉尺。三、梁表尺。四、漢官尺。五、魏尺。六、晉後尺。七、後魏前尺。八、中尺。九、後尺。十、東後魏尺。十一、蔡邕銅侖尺。十二、宋氏尺。十三、萬寶常水尺。十四、雜尺。十五、梁朝俗間尺。後周氏達奚震等議。獨以鐵尺爲允。卽十二宋氏尺也。其說曰。今以上黨羊頭山黍。依漢書律歷志度之。若以大者稠累。依數滿尺。實于黃鍾之律。須臾乃容。若以中者累尺。雖復小稀。實于黃鍾。不動而滿。計此二事之殊。良由消息未善。其于鐵尺。終有一會。且上黨之黍。有異他鄉。其色略烏。其形圓重。用之爲量。定不徒然。正以時有水旱之殊。地有肥瘠之異。取黍大小。未必得中。按許慎解字。黍體大。本異于常。疑今之大者。正是其中。累百滿尺。非是會古實侖之外。裁剩餘此。恐圍徑或差。造律未妙。就如臧勛取滿。論理亦通。今勘周漢古錢。大小有合。宋氏渾儀。尺度無舛。古者黃金方寸重一斤。今鑄金校驗。鐵尺爲近。未及詳定。會高祖受命而止。唐貞觀中。又詔張文收鑄銅斛秤尺。咸得其數。詔以其副藏于樂署。至武延秀爲太常卿。用爲奇玩。以律與玉尺玉斗舛合獻焉。開元中。將攷宗廟樂。有司奏請出之。敕惟以銅管付太常。亡其九管。國朝金石傳自周代。世宗常詔王朴累黍定尺。以爲律管。管旣不便作。準之尺寸。于今具

在。而當時實錄。不論秬黍。未知何用。卽加酬定。且五代離亂。古器蕩然。雖欲制作。靡所緣傍。時無神瞽。孰敢取中。獨非莫知。獨是莫曉。工乎音者。不能言義。工乎書者。不能察聲。信乎音聲之難。不可以言曉者也。故曰。知之者欲教而無從。心達者體之而無師。方今去聖既遠。知音又寡。但取朴準。調叶八音。屬者太常。臣燕肅以律準尺之三分。欲爲十二律管。而黃鍾九寸。遂不得聲。更廣空道。乃與律應。雖管內均厚未悉。如法。然深疑今尺比古差短。太常鍾石。遂及于清流。至法部轉用高急。臣以爲宜求索上黨秬黍。如達奚震之言。選其精圓。累定尺寸。求管得管。求聲得聲。以所營之聲合周時之準。苟高下符會。清濁無差。卽可遂爲定法。頒布方國。足以示陛下同律度量衡之制。脫有與準未合。卽乞募知音。別用新管。參攷中聲。檢攝羣音。制定雅樂。庶乎正歷代之謬。亦何憚焉。

禮院議祖宗配侑

〔案〕仁宗本紀。係景祐二年。祔遷太常。同知禮儀院時上歷代名臣奏議作嘉祐二年誤。

臣等聞王者建廟祔之嚴。台昭穆之綴。祖一而已。始受命也。宗無豫數。待有德也。由宗而下。等胄之疏戚。以爲迭毀之制。使後嗣雖有顯揚褒大。猶不得與祖宗竝列。所以壹統乎尊尊。古之道也。皇帝陛下。躬孝治。發德音。永惟三后之盛烈。際天接地。而推尊之。禮有所未稱。明發悼懼。圖惟厥衷。使攸司得稽舊章。開羣議。據懿鑠。闡孫謀。將以昭合靈心。垂榮無極。非臣等孤陋所能及已。竊以太祖皇帝。誕受寶命。付畀四海。鋪敦變伐。潛黜不端。夷澤潞之畔。兼淮海之味。東焚吳興。右困蜀壘。湘楚閩粵。請吏入朝。當此之時。天

下之人去大殘蒙更生。卜年長世。丕闢洪業。太宗皇帝敦受具邇。席運下武。襲天之討。底定太原。由是懜九刑之辟。藝四方之貢。信賞類能。重食勸功。官無煩苛。人無惆怨。又引摯紳諸儒。講道興學。炳然右文。與三代同風。真宗皇帝乾粹日昭。執競維烈。重威撫和。休寧北方。順斗布度。先天作聖。遂攷夏諺。紹虞巡。祿啓宗。育穀冀壤。翕受瑞福。普浸黎元。宵翹跂行。罔有不寧。百度已備。眷授明辟。恭惟一祖二宗之烈。歷選墳誥。未有高焉者也。昔成湯爲商之祖。太甲太戊武丁。實號三宗。后稷爲周之祖。文王武王。庸建二祧。高帝爲漢之祖。孝文孝武。特崇兩廟。皆子孫世世奉承不輟。我皇伯祖經綸草昧。遂有天下。功宜爲帝者之祖。皇祖勤勞制作。皇考裁成治定。德宜爲帝者之宗。三廟並萬世不遷。宣布天下。以示後世。臣等請如聖詔。至于升佑上帝。哀對先謨。本之周道。克祚典禮。昔太宗親郊奉宣祖太祖配焉。真宗肇祀奉太祖太宗配焉。自爾有司不敢輕議。今二宗同躋不祧之位。則禮無異等。伏請自今以往。太祖爲定配。二宗爲迭配。稱情適事。理實無嫌。其將來皇帝親祠。伏請以三聖偕佑。上顯對越之盛。次申遙追之感。聖人之能事羣臣之大願。此後迭配。還如前議。昔唐高宗之上封也。以太武皇帝文皇帝配昊天。明皇之封也。以高祖配天。睿宗配地。開元之著禮也。高祖配方丘。太宗配神州。此二宗迭配之前例。垂拱開元之間。高祖太宗高宗同配昊天。真宗登介丘降社首。竝以太祖太宗崇配天地。此三聖偕佑之明準。其歲時常祀。則至日圓丘仲夏皇地祇配以太祖孟春祈穀夏雩祀冬祭神州配以太宗孟春感帝配以宣祖季秋大饗配以

眞宗伏請皆如禮便。陛下重宗祧之事。鑒照前載。抑畏虔敬。讓而不專。故令臣等得申愚管。謹用敷罄。惟聖心裁鑒。

奏乞減編鐘事

〔案〕以下諸疏。當在景祐三年。命官校太常鍾律之時。

准中書送下監鑄編鐘所李照狀爲乞減編鐘十六爲十二事。狀後批奉聖旨。送修撰樂書馮某等詳定。聞奏者。右臣竊以作樂制器。取象非一。本乎律呂。播爲音均。用在極和。要歸協雅。而短長清濁。還相損益。諸儒駕說。各自名家。援據經師。資爲辯博。較其實至。孰有定論。昔伶倫命律。初無配類。后夔典樂。惟取克諧。究理益深。後人滋惑。原聖人立樂之意。豈獨執于一方。金石設縣。屢易其數。自鍾縣十二。以至編縣二十四。蓋八音之器。因物制宜。歷代相沿。遂多創述。若絃聲一倍。以至于五十。律聲一倍。以至于三十。或減半以爲得。或備數而無害。變均度典。應和爲經。工師常員。雅鄭無辯。不足以備問對。擊考之度。第循其故。獨何曉于是非。周朝樞密使王朴。嘗造準以攷聲律。太常寶殿和峴。亦經參校。論者以爲尺度太短。雅聲過高。自此少能知音。莫傳其業。今止以照素識音律。使校定大樂。照又調合鍾齊。務要和聲。察其用心。良亦精密。且又請改編鍾十二。以爲與律數而足。但學者多所未嫻習。周官或乃失傳。下議以詢。博求至當。況禮樂之大典。方太平而後備。若竝采衆說。則有會禮聚訟之煩。若遵更古法。則有事不師古之戒。臣攷視圖載。皆有趣義。願聖上覽其意而定焉。

論太樂置雷鼓靈鼓路鼓備而不擊及無三鼗

臣按周大司樂之職雷鼓雷鼗奏于圓丘以祀天也靈鼓靈鼗奏于方丘以祀地也路鼓路鼗奏于宗廟以格祖也歷代用焉著爲樂令然則小鼓爲大鼓先引得作樂之漸故兩施無嫌也國朝崇薦郊廟但各設鼓于樂縣之內備而不擊夫有鼓無鼗于禮已闕設而不用在闕尤甚蓋上襲五代抗敝失傳有司持循罔暇論討臣以爲可詔本署稽舊典訪遺法作爲三鼗以備大樂祭祀之際其鼓若鼗皆使縣工播而擊之用諧音節如此則器備禮完神祇來格矣舊說鼗者如鼓而小以木質中作柄雷鼗柄各四枚爲八面靈鼗柄各三枚爲六面路鼗柄各二枚爲四面旁以結皮爲耳搖之還自擊也以通雷鼓靈鼓路鼓掌鼓之工每面一人左手播鼗右手擊鼓云

論太樂署有春牘之名而無春牘之器

臣觀景德中李宗諤所進樂纂革部中著春牘其說曰周禮笙師掌教春牘應雅以作饒樂賓醉而出奏械夏以三器築地爲之節三器謂牘也雅相也明不失禮也大五寸長七尺短者或三尺其端有空漆畫之以兩手築地今竝于宮縣舞樂中用臣比徧問樂工言初無此器及責其樂器之籍則明著春牘而說與樂纂相符又景德樂工于今多在詰其所以乃云恐宗諤論著之時止憑本署舊文誤著于樂纂耳臣謹采三禮圖所畫春牘之狀大略可曉然檢覈著令及舊史其文武二舞諸工所用但有鼗鐸錚鐃和雅干戚籥翟

等器不著春牘。則知後人設采古名以爲空說矣。

論竽及巢笙和笙

臣奉詔與太常臣燕肅等圖畫太常樂器以備程覽。至匏部有竽及巢笙和笙共三種。按舊說竽長四尺二寸三十六簧。宮管在中。形參差像鳳翼。巢笙十九簧和笙十三簧。今據太樂諸工以竽巢和三種併爲一器。皆取胡部七十管笙爲之。但以宮管移徙左右用爲小異。其巢和二笙在景德中李宗諤又奏定二義管悉貫匏中。今爲十九管。臣曾索于樂署得鳳笙一種。樂工言此古器今不可用。推驗形製乃古竽也。其長四尺有餘三十六管。列管參差及曲頸皆爲鳳飾。其空悉在管外。歲久不治有管無簧。今但祕而存之。爲無用之器。臣以爲可募知音者修復古竽以合正聲。革易當今署工所用淺俗滯澁之器。勿令亂雅。并按竽以合正聲。悉還舊製。傳曰放鄭聲謂此物也。

論引武舞所執九器各有所用

臣按武舞六十四人。左執干右執戚。雖爲八列。又別使工人執旌居前。次執鼗。次執鐸。次執鐃。次執相在左。執雅在右。各分行夾引。至樂作舞入。則自發而下。咸振作之。舞工定位而止。及舞將退。又振作之。舞工畢出而止。臣竊詳鼗鐸之設。義不虛生。蓋舊史禮經但舉其凡。不言其細。故輩出旅進。無有先後。且鼗者所謂導舞也。鐸者所謂通鼓也。鐃者所謂和鼓也。鏡者所謂止鼓也。相者所謂輔樂也。雅者所謂

陔步也。夫鐸于鐃。鐃在周鼓人四金之奏。以和軍旅也。武舞象功。故得以軍器參焉。是舞之容節。導于鼗。通于鐸。和于鐃。止于鐃。輔于相。陔于雅。義可見矣。寧有導舞方始。止鼓參焉。止鼓既搖。通鐸亂焉。進退不倫。終始無別。臣雖不習故事。竊以私意度之。謂當舞入之時。鼗鐸以先之。鐃以和之。相以輔之。雅以節之。及舞之將成也。則鳴鐃以進行列。樂雅以陔步武。各分左右。與舞俱出。其鼗。鐃。相。皆止而不作。故司馬職曰。鳴鐃且卻。斯之謂矣。如此。則允協樂意。庶復舊職。

郭正不應爲嫁母持服狀

臣竊惟禮者。叙上下。制親疎。別嫌明微。以爲之節也。故三年之喪。雖天下達禮。至于情文相稱。必降殺從宜。故尊有所中。則親有所屈。不敢以所承之重。而輕用于其私者也。伏見前祠部員外郎集賢校理郭正。生始數歲。卽鍾父喪。而母邊氏。更適士人王渙。正焚炙孤苦。以訖成立。見無伯叔。又鮮兄弟。奉承郭氏之祭者。惟正一身而已。母邊氏適王氏。更生四子。今邊不幸而計聞。正乃解官行服。以臣愚管見。深用爲疑。伏見五服制度。敕齊衰杖期。降服之條曰。父卒。母嫁。及出妻之子爲母。其左方注曰。謂不爲父後者。若爲父後者。則爲嫁母無服。今詳邊氏嫁則從夫。已安于王室。死將同穴。永非于郭偶。而正旣爲父後。則宜歸重本宗。雖欲懷有慈之愛。推無絕之義。亦不得爲已嫁之母。抗父而盡其禮。何者。輕奉父統。則郭之承重。更無他親。備執母喪。則王之主祀。自有諸子。臣詳求制旨。疑正不當解官行服。夫禮有所殺。君子俯就也。

義有所斷。聖人不專也。況當孝治。宜謹繇經。伏乞降臣此狀。下有司博令詳議。其郭正爲父後爲嫁母。應與不應解官行三年之喪。然後明垂定制。俾守其規。臣備禮官。不敢寢嘿。謹具狀奏聞。

上三冗三費疏

〔案〕歷代名臣奏議。係寶元元年。郭樞三司度支判官時上。

臣伏見西賊叛逆。未卽梟截。申命將校。警飭邊陲。陛下日昃憂勤。特軫調發。內經聖慮。旁咨羣謀。臣誠不肖。竊用感憤。以爲勇夫扞外。儒者計內。合爲威略。以行天誅。則跳梁小醜。指期烹醢。故敢妄陳愚見。以佐萬一。臣聞兵以食爲本。食以貨爲資。在易聚人。在書八政。誠聖人一天下之歸之具也。以天下取之。以天下用之。量入爲出。故天子不得私焉。傳曰。足食足兵。民信之矣。今左藏無積年之儲。太倉乏三歲之儲。南方治銅。廣而不發。承平如此。已自彫困。其故何哉。良由取之旣殫。而用之無度也。臣不能悉知朝廷之經費。且以臣素所見者言之。何者。大有三冗。小有三費。以困天下之財。財窮用竭。乃今更欲興數十萬衆。以事夷狄。無謀甚矣。陛下誠能超然遠覽。燭見根本。去三冗。節三費。專備西北之屯。尙可曠焉高枕。無匱乏之患。何謂三冗。天下有定。官無限員。一冗也。天下廂軍不任戰而耗衣食。二冗也。僧尼道士日益多而無定數。三冗也。三冗不去。不可爲國。今宜降詔。斷自今日。僧尼道士已受戒具者。且使如舊。其在寺帳爲徒弟子者。悉逮爲民。勿復歲度。今日以後。州縣寺觀畱若干人。且令後來之數不得過此。此策一舉。可得耕織夫婦五十萬人。則一冗去矣。今天下廂軍。不擇孱小。胥弱。悉皆收配。纔圖供役。本

不知兵。亦且月費廩糧。歲費庫緡。數口之家。不能自庇。于是相挺逃匿。化爲盜賊者。不可勝算。朝廷每有夫役。更籍農民。以任其勞。假如廂軍可令驅以就役。方且別給口券。間望賜錢。二端相率。不便明甚。陛下若敕天下廂軍。今日以後。除州軍須要防捉。別畱三百人。自餘更不收補。已在籍者。許備役終身。如此。則中下之家。悉入農業。又得力耕者數十萬。則二冗去矣。國家郡縣。素有定官。譬以十人爲額。常以十二加之。遷代罪謫。足以無乏。今則不然。一位未缺。十人競逐。紆朱滿路。襲紫成林。州縣之地。不廣于前。而陛下官五倍于舊。吏何得不苟進。官何得不濫除。陛下誠能詔三班。審官院。內諸司。流內銓。明立限員。以爲定法。自今以往。門廕。流外。貢舉之色。實置選限。稍務擇人。俟有闕官。計員補吏。內則省息俸廩。外則靜一浮華。則三冗去矣。何謂三費。一曰。道場齋醮。無日不有。若七日。若一月。若四十九日。各挾主名。未始暫停。至于蠟蔬膏麪。酒稻錢帛。百司供億。不可貲計。而主者勞緣。利于欺攘。奉行崇尚。峻于典法。皆以祝帝壽。奉先烈。祈民福爲名。欲令臣下不得開說。臣愚以爲陛下上事天地宗廟。次事社稷百神。醴醑粢盛。犧牲玉幣。使有司端委而奉之。歲時而薦之。足以竦明德于天下。介多福于黔庶。何必道場齋醮。希屑屑之報哉。是國家抱虛以考祥。小人誣神而獲利耳。陛下若斷自聖慮。取必不可罷者。使略依本教。以奉薰修。開啓有時。賜與有度。則一費節矣。二曰。京師寺觀。或多設徒卒。或增置官司。衣糧所給。三倍他處。帷幄謂之供養。田產謂之常住。不徭不役。坐蠶齊民。而又競飾神祠。爭修塔廟。皆曰不費官帑。自募民財。此誠不逞罔

上之尤者。夫民藏于國。國藏于民。財不天來。而由地出也。役不使鬼。而待人作也。舍國取民。其傷一焉。伏望陛下。切敕州縣。普令罷止。則二費節矣。三曰。使和節度。不隸藩要。貪取公用。全濟私家。跡夫節相之建。或當邊鎮。或臨師旅也。公用之設。或以勞衆而饗賓也。今則不然。罷黜大臣。率叨使相。安居都邑。普蒙公用。取生人之資力。爲無功之奉養。坐糜邦用。莫此爲甚。伏望陛下。寶惜名器。使授受惟才。自今地非邊要。州無師屯者。不得建節度。已帶節度。不得留近藩及京師。則三費節矣。三冗已去。三費已節。數年之內。用度必饒。臣又聞之。人不率。則不從。身不先。則不信。陛下若能躬服至儉。風示四方。錦綵金玉。不得妄費。請自後宮爲始。衣服醪膳。無益舊規。請自乘輿爲始。然後天下嚮應。民業日豐。人心不搖。師役可舉。雖使風行電照。飲馬西河。蠢爾戎酋。可玩之股掌中矣。寧與今日誅求財用。課鹽攤茗。爲成成之計者。同年而語哉。臣誠狂妄。不曉禁忌。輕進愚策。惟陛下裁赦其辜。

景文集卷二十七

奏疏

請下罪己詔并求直言疏

〔案〕歷代名臣奏議係寶元二年。祁守刑部員外郎時上。

臣聞王者父事天明。母事地察。政合而祥至。道失而咎臻。自然之應也。然至亂之世。不能絕祥。甚治之代。不能無咎。僻君以祥自泰。放益侈而趨亡。賢主以咎修德。故愈畏而蒙祉。則祥無必慶。咎無固凶。視銷伏之如何耳。臣伏見頃歲以來。災眚數見。依類託寓。異占同符。天本示法而尊。乃有躔離流薄之變。地當安固而靜。乃有都國震動之占。陛下奉承郊丘。歲豐月潔。當蒙介福。翻至大異。何哉。得非事有召奸。法有階隙。天子宋室。諄諄存顧。先幾豫慮。以啓聖心。欲陛下據易圖難。緣微警著。奮揚剛德。固執主威。厭銷未萌。以光不業也。臣伏讀前史五行志。以驗于今。累威重譴。不可不察。若乃羣星流散。則民人蕩析之象也。月行黃道。地震州邑。則邊戎窺間。臣下擅恣。后妃將盛。年穀且饑之兆也。去年火焚興國寺浮屠。延燔藝祖神殿。已而盜壞宗廟鉅器者再。則神不昭格之意也。自昔災異之發。遠者十數年。近者三四年。隨方輒應。類無虛已。陛下何不暫平清慮。推求其端。方今典刑設張。上下禋穆。而臣便論危事。必難取信。然陛下試一念至。假有蕩析。以何策固安。假有饑空。以何理振救。脫致窺間。可任之將謂誰。倘令擅恣。可防之姦有

幾災異不驗。國之福也。苟使遂驗。則陛下禦之之慮。得不素具于懷中哉。然請先言其要。臣聞君以操柄爲重。臣以奉命爲恭。柄捨之。則重者反輕。命竊之。則恭者更僭。伏惟陛下。念得賞之典。刑罰之權。雖覽羣言。一決宸慮。無委成假借。以開貴近牽制之私。書稱惟辟作福。惟辟作威。夫威福者。天子之所以固大寶。制兆人之術。臣有作福作威。則害于而家。凶于而國。古之王者。亦何能使刑惡當罪。賞皆稱功。要之事出于主。則納忠者有歸。政出于臣。則植私者必衆。傳曰。倒持太阿。言柄之不可失也。又曰。吐珠必含。言失之不可收也。若夫後宮戚里。祈恩可賞者。日月不乏。陛下且常斷而不聽。以示至公。內省黃門。給事左右。亦宜數加訓勅。使思不出位。此皆助陽抑陰之術也。臣聞伯禹三王之長。逢臺引慝。宣王成周之良。思忠側身。故能感徹神祇。收還威怒。回沴氣爲太和。化已衰爲中興。陛下覽照今古。至諄至熟。今變告日著。中外暴聞。而罪己之問。不形于詔書。思患之謀。不置于詢逮。委遠天戒。虛而未警。踰時越月。羣下默然。聞者但引繩黃。晨齋夕唄。修不經之細祀。寒可懼之大變。人且未信。天胡可欺。臣誠至愚。竊恐銷伏之間。未爲得計也。伏望陛下。不以災之未應。遂爲寢安。不以歲之屢豐。使忘荒饉。普詔百執。各貢所懷。庶幾天下條貫。粲然先見。粗舉六事。以裨萬一。聯寫于左。如有可采。當當條陳。糾別。惟陛下裁教其罪。姑垂省閱。臣無任。替狂待罪之至。

議樂疏(卷)此疏當係寶元二年。當時制鐵院同修禮書。時上歷代名臣奏議。元祐元年。疏。

臣伏觀右司諫直集賢院韓琦奏劄子節文。臣曾將景祐廣樂記石詳備見實紀。李照所造違古之樂。上薦天地宗廟。臣竊聞和峴減定鍾律等見今存在。欲乞特降聖旨指揮下太常寺復用舊樂者。奉敕已差資政殿大學士宋綬等與兩制同共詳定聞奏。伏緣臣自景祐元年中曾蒙差付太常寺與燕肅等同共磨治鍾磬。後來親見李照重定律度及相次提舉胡瑗別造鍾磬。臣于太常樂器粗知本末。苟有所見。不容隱默。謹用畫一如後。

一李照所造鍾磬。當時只是將太府寺布帛尺一面定法改造。比舊樂頓下四律。伏緣李照資性詭僻。辯論專固。莫非出自私意。不循古法。其尺約長王朴尺二寸。其斗法以六百二十黍爲一龠。六龠爲一合。古

合龠爲合。今頓差四合。

十合爲一升。十升爲一斗。謂之律斗。其秤以一升水之重爲一斤。比今太府見川官秤一斤零十一兩。十斤爲

一秤。

今太府以十斤爲一秤。

謂之律秤。又減鍾磬十六枚爲十二枚。自古經史中無十二枚爲一架。其鍾之形狀並不依典故。聲韻

遙長掩遏羣樂。又李照自造大筚篥亦充大樂行用。皆愆憲新聲不依古制。及有新降到雙鳳管樂工吹之。竝不成聲。李照雖自稱曉達音律。其實與伶官賤工識見無異。遂敢敗壞祖宗以來舊樂。使朝廷以不法之器薦見天地祖宗。四海傳聞莫不竊議。只如照所定黃鍾之管。乃是南呂倍聲。舊黃鍾九寸正聲。卻降在大簇夾鍾之間。其大簇商聲。君聲君位也。今君聲降在臣位。羽聲來處尊宮。三年有餘于理尤害。天災人事不合常理。皆不祥之大也。如此數事。人無愚智。所共明知。陛下況深達律呂。可以斷自聖慮。使

從改正。應于李照曾奏請添損。竝違今背古者。乞如韓琦所奏。一切皆令停罷。盡復祖宗舊制。

一太常寺舊樂。本自唐昭宗時。雅樂亡散。器無子遺。尋有博士商盈孫。參約典故。更造鍾磬。其後五代相傳。習而不改。至周時。王朴重定尺度。略加添正。太祖朝。又詔和峴以景表尺重加磨治。稍令聲下。昨緣景祐二年。燕肅始乞修正樂器。其時只得王朴律準。又無王朴所定律尺律管。參驗音韻。而燕肅只據律準與鍾磬見聲。按定高下。卽是此太常舊樂比王朴時已自不同。況和峴減定後。又經眞宗朝景德中。李宗諤一次修飾。至燕肅凡經三度磨鑄。然俱不先立尺度律管。所以後來無處根正法度音律。然其舊器傳自唐末。祖宗三聖無人輕議。用之薦享八十餘年。雖非的然如舜韶周武。法度明備。要之沿襲本末。實與典禮最近。非同李照率意詭妄。製作不經。今若陛下且以攷舊典。差近法度。卽乞先取景表尺裁鑄律管。以按王朴律。然後和峴當時所定聲律高下。確然可見。況舊鍾尙有七百餘枚。係本寺收管。略加磨鑄。令與聲律相協。所有舊磬。爲照定樂時盡底界截破壞。無見存者。若且將李照所定石磬。自太族以下刻磨長短。亦與舊樂黃鍾以下髣髴相近。及將本寺磬朴二百餘片相兼添補。亦可諧合音律。與鍾粗得三縣。卽可于將來南郊大禮前一時了畢。不過數月。便可見功。其餘絲竹諸器。只是移正聲調。便成雅樂。況禮樂之本。出自天子。今陛下天縱睿聖。通知音律。復古順道。何所致疑。伏乞卽下有司。速令修復。以旌善述之美。

一景祐三年詔令臣監領胡瑗鑄造鍾磬一架臣伏見胡瑗曉算法能將先儒所說黃鍾管內八百一十分爲方分算法竝與鄭康成周禮注及班固律歷志古法相合自隋唐以來諸儒辨論黃鍾一會之法皆不及瑗相次于雜物庫請銅鑄之時忽于雜銅內得古鍾三枚卽不知其年及是何州府納到臣與故翰林侍讀學士馮元卽時驗認其鍾古質精妙項鍊皆有廉隅上有三十六乳餘外瑤雲氣爲飾有兩鑿之制如鈴不圓正與周禮所說形制相符一鍾破損二鍾尙可叩擊遂子細洗滌于鍾上有篆文兩行其篆亦字體古簡推本其文不是近代所造乃是漢魏間所用者其文曰越作朕皇祖文考寶和鍾越思萬年子子孫孫永寶用享凡二十二字臣與馮元商量此旣古器又合經典除三十六乳與鄭康成說小異康成以爲鍾每面三十六乳卽一鍾遂畫圖樣進呈後一面勒令胡瑗悉依古鍾形狀製造新鍾成一十六枚其胡瑗所定律尺律管比王朴鍾只下半律鍾磬甚得諧韻其時不曾許當面進呈遂只送太常寺收係卽日見在後來又蒙別差官詳定李照胡瑗等律尺管其時議者皆云胡瑗實會之黍或有大小不同以爲未盡合古遂抑而不行至于八百一十分之法則盡以爲然無有非者臣以爲胡瑗之尺黍雖有長短大小之差未盡合古然比舊樂又近法度如更使諸儒略加論討庶可施行而合雅正矣臣又竊嘗謂陛下用心詳定雅樂之日獲此古鍾乃是瑞應因此若便定律石律管使諸儒極意論難從其長者定爲尺法然後作鍾石以聲之有何不可而前來議者固執李照不法之器以爲此樂已經郊祀天地不可輕改更候有知音者然後改

之且祖宗舊樂相傳八十餘年。經真宗東封西祀。一旦爲李照狂妄率然敗壞。卻無輕改之憚。今欲依據經典。裁正律度。反以爲更候知音。假如今世遂無知音。則是李照不經之器。便傳後代。取笑千載。此亦陛下昭然可判議者之大謬也。臣以爲陛下既自明律度。不須更以知音爲言。夫知音自古難得。非獨今也。若世無夔牙。則且當以法度自據。雖有清濁高下。其失不遠。故臣願陛下只將胡瑗八百一十分之法。詔取上黨臣黍。擇其中者。差一二精力宮官。及左右一二信臣。于宮中重加校定。陛下因以餘暇親臨制決。黍定求寸。寸定求尺。尺定則律度量衡四物皆正矣。然後依古法。將新尺試以推步晷景。若合。此一不謬也。試以新管理地候氣。氣候若應。此二不謬也。然後可以遂頒天下。明告以律度量衡之法。因之修定雅樂。詔當今稍知音律經術者。同加討論。事無不齊。然此一事雖非朝夕急政。陛下能以萬幾之暇。慮而定之。亦千載不刊之美也。其有先獲古鍾。恐禁中忘記當時進呈圖樣。今再畫到一本。隨狀進呈。右謹具如前。臣以儒史爲業。合爲文辭敷啓。又緣臣久在病假。既不獲乞上殿面奏。今來事涉辯論。不敢修飾文語。貴要暢盡事理。是敢直說本末。謹具狀奏聞。伏候敕旨。

論乞別撰郊廟歌曲明述祖宗積累之業

歌詩之興尚矣。自陶虞而上。書逸其傳。商頌概有存者。而周詩大備。竊聞班固之論也。以爲商周雅頌。上本有娥姜嫄。降乙履啟。而高稷始生。元王公劉古公太伯王季姜女大姒作合之德。乃洎成湯文武受命。

武丁成康宣王中興。下及輔佐伊尹周召太公申伯召虎山甫之屬。靡不褒揚。旣信美矣。聲始歌詠。而施及金石。洋洋颯颯。遂盈塞乎天地之間。使後世子孫。有以祖述稱頌。而據之無極也。孤秦亂剝。禮亡樂缺。逮漢六世。始立樂府。采詩弦誦。多舉司馬相如之屬。造爲詩賦。略論律呂。以合八音之調。然其郊廟歌詩。未有祖宗之事。又不制雅樂。有以相變。盛德之音。寢以失章。史官追憶。深詆其非。南北霸雜。音諸哀怨。儻篇促節。以雕蔚相矜。唐家累盛。頗憲前烈。詔禮于野。綴樂于旒。然至郊廟詠歌。亦止一時之事。麗不逮鄭。正不入雅。累句庸音。商周之風衰焉。安巢挺亂。正聲兼失。或入河海。或淪坑谷。宋興承五運末流。繼千載紹業。受命之始。日不暇給。故未遑協律之事。而樂正禮官。又非夙儒故老。制作之懿。久無聞焉。雖薦侑大禮。別製辭曲。然皆襲沿舊體。未始改爲。遂使祖宗耿光盛烈。幽伏槁簡。天命靡昭。以爲神羞。而武穆文孫。春秋助祭。但習容典。不知王業之艱難。誠可畏也。臣朴野芻微。不達故實。竊惟太祖武皇帝。推闡位膺正統。撥亂侮亡。以黜不端。東纓吳越。右攘蜀蠻。大去荆讎。變伐舊俗。士無離傷。邦用底定。罷諸道節度。以絕僭萌。收天下精兵。以強京服。太宗文皇帝。鋪敦武旅。遂定并汾。分遣良吏。綏靖萬國。斂才懋官。內經百度。平租躬藉。以賜四人。貶成讓德。卒罷封禪。肆我真宗。紹休聖功。于是匈奴穿塞。侮略邊郡。一戎啓行。射殢名酋。六羸遁去。厥角請罪。然而不念細故。許其歡盟。休寧北方。于今是賴。而又進妙道。迪靈篇。柴奉高。濟汾河。景光瑞福。歲穀翕習。臣所不能盡道。商之發祥。周之監觀。方茲蔑矣。然而清廟詠歌。但紀寅恭。滄濯

之細。不推積德累功之本。千品萬官。靡所寄言。故臣願陛下。萬幾之餘。取三聖實錄。撫其武功文德在民耳目。尤祥極瑞。非人力所至者。鋪袞發揚。作爲歌詩。別詔近侍。略依生民公劉。猗那。長發之比。裁屬頌聲。使被金石。尚體要而去浮靡。根中和而矯淺誣。使言質而易曉。理罄而行遠。俾天下昭然。知祖宗造邦濟世之勤。子孫無滿假怠遑之志。臣下有祖述奉揚之美。超唐軼漢。遂躋三代。寧不盛耶。

論精選太常樂工及募能知音者備太常官屬

昔虞舜命后夔典樂。教胄子。其言曰。詩言志。歌永言。聲依永。律和聲。夔亦曰。於予擊石拊石。百獸率舞。自周以上。胄子出于公卿。聲工皆有明德。其爲樂可以道古。其爲舞可以動容。故能來格祖考。而同合天地。道衰官失。政移諸侯。制度陵僭。音曲曼靡。然且晉有師曠。魯有師乙。判南北之風。執商齊之宜。援古驗今。若合符節。其後士人。則漢有京房。魏有杜夔。晉有荀勗。隋有鄭鐸。唐有張文收。祖孝孫。雖未能攷正中聲。以盡善美。其推本律呂。有足稱道。自梁訖周。尋亂不厭。猶使王朴。竇儼。緒求墜韻。哀合遺器。累黍定尺。造準寫聲。求七均。叩五音。以成八十四調。儼又著大周正樂一百二十篇。雖廣而不要。雜而無類。苗莠相敗。雅鄭同儕。然禮失求野。或有可采。而宋興。達者尙未聞焉。臣謂古之所以爲工者。皆精敏之人。後之所以爲工者。皆輿廝之賤。古之所以總司者。材堪責任。後之所以總司者。官達則遷。樂不逮古。責于何有。比來諸工。尤爲滑泥。或坐區賈子。或力穡農人。苟避乎了。咸求著籍。未識所習。況責所聞。族居州處。兀如牆面。

雖誨以六樂教以二南亦不能諧神祇和邦國矣。朝家上纂謨烈成事俊良必不借才無容慚德顧求之任之未至耳。且一日失官尚及于死三年廢樂曾何不壞故有其人則樂存無其人則樂息。昔周官盡在武坐且或失傳漢準其存律家莫能取定又況年禩綿囂器用淪亡賢者恥而不精鄙夫濫以安處而望樂正雅頌奚由致哉。臣願陛下明下詔書且募天下知音之人秩以微祿使備太常官屬除其歲限寢使討論擇其所長以備闕典又按舊令太常諸工取年十八以下資性可教者使滿定員明立章程以判勸陪如此則不過十稔官修事備以須陛下功成作樂矣。

乞禁便俗字

伏見朝廷每有冊書詔令布下四方而使俗作字不據經古及題署宮殿率多訛略萬民所察百官所瞻誠非其宜類不可悉舉臣且一二言之今之勅字乃古勞來之勅音資自唐以來習而不悟今若改以爲敕義亦無難議者便謂行之已久變必驚俗此非通論也昔隋唐詔敕以釋爲替移之字後因顏師古摘發其謬始議改焉則當時以釋爲替猶今以勅爲敕夫釋替雖謬尙是一音勅敕相訛遂乖兩讀自宜稽古改從本體宮殿之署標榜高嚴遠人朝覲注目觀仰學在四夷亦不可誣漢丞相蕭何自題蒼龍白虎二闕後世署書乃由何始當時立法寧苟簡耶且如今紫宸垂拱常所御殿而殿字從屍從攴今之左偏遂尸下作共垂字從士今乃作山紫應從此今書作此此俗宸應從此此俗今書作辰辰俗開門以西爲面外龍

門以有代官如此之類。不得不改。及詔制之語。以本明音爲本。以母無音爲母。以檢敏音爲檢。以開弁音爲開。斯則字訛音變。尤難行遠。臣聞太宗皇帝常詔右散騎常侍徐鉉攷正說文。鉉之言曰。若乃高文大冊。則以篆籀著諸金石。至于常行簡牘。則草隸足矣。當時謂鉉爲知言。臣愚以爲詔文冊詞。府號官稱。宮室題榜。皆當垂示史冊。非尋常簡牘之類。願下大臣討論文字。更俗隸之失。求篆籀之眞。昭示有司。斷從正體。

論國忌

伏見列聖忌日。沿唐之舊。百官伏閣慰訖。咸詣寺觀。跪伏齋贊。謂之行香。仍置神位。進奠蔬饌。臣竊思之。禮尤不經。方外之言。本以懺罪求福。誘訓迷妄。臣僉委巷。不達死生之變。故于喪葬亦或用之。至于朝獻帝範。非若匹夫下俚。可行之也。臣愚不敢遽敷國家積累之慶。且自太祖而下。豐功鉅德。家至戶曉。生爲睿明。歿爲上神。何福之求。何罪之懺。求于非福。則是詔祭。懺于無罪。則是誣親。沿事索理。謬悠可判。且其諡在金冊。主在清廟。每春秋享祀。前誓有司。齋戒奉之。濯濯潔之。禮以相儀。樂以節步。尚畏不饗。以爲非馨。今乃緇毳羽衣。輕接光烈。熟具粗餼。以希迪嘗。使在天有知。其不能下。而臨享也明矣。願罷忌日百官行香。及撤去所設神位。必若國家難于驟改。則每及忌日。止令道釋二家。自率其徒。薰臠謂嘔。列爲蔬奏。間遣一使。馳詣陵寢焚之。以伸蒼黔謝生之報。庶幾近于禮歟。

乞置太廟神御庫待制
口奏

宗正寺奏爲趙希言劄子。奏太廟內神御物。有螭頭冊。蓋牀燭臺等不用之物甚多。約金萬餘兩。銀八千兩。乞差官別爲處置。所貴盜竊不生。奉聖旨。令宗正寺相度。壁畫間奏。寺司檢會。太祖室內有黑漆蓋二隻。元有折拽。下裝釘痕。見在。欲乞將不用者。蓋冊牀四十餘件。及螭頭等。依太祖室內素蓋。拆拽金銀。所有竿杖。竝乞依莊穆皇后室內神帳法物焚埋。狀後中書批送禮院詳定。臣謹按。神御之物。在祖宗之時。其數尙少。故就致火室。不須他處。及時歷三聖。崇奉益恭。而寶蓋卸牀。充滿二室。今趙希言及宗正寺。乃欲除合用器物外。盡乞毀折焚埋。以防盜竊。質之禮意。殊未得宜。且天子宗廟之重。以金銀崇飾神御。尙畏招致盜竊。不知官司何用。條禁何施。況非時毀損。驚動羣議。又未必合祖宗神靈之意。竊尋周禮有天府。掌祖廟之守藏。寶物世傳者皆在焉。伏詳今廟地狹隘。不可別爲庫室。欲望以宗正寺西偏。南直太廟。卽宮闈令廡屋。其地雖小。可建大屋十數間。將神御不用之物。悉移置于中。號爲太廟神御庫。令宗正寺一就管掌。責無毀瘁。兼合舊章。其灼然有敗爛什物。卽乞焚埋。使無褻瀆。取進止。

景文集卷二十八

奏疏

乞開治渾河

〔案〕歷代名臣奏議係慶歷二年祁知陳州時上

臣知壽州日伏見本州安豐縣有芍陂自古所傳元引龍穴山水及渾河水入陂每歲灌田萬頃近年多被泥沙淤淀陂池地漸高蓄水轉少龍穴山一派水源既小今來只藉渾河注水入陂後來渾河一道水渠本縣又不修開遂至水道壅塞陂水淺涸臣自到任後併值二年乾旱去年自六月放竭陂水只是救灌得側近一二千頃是以壽州米價踴貴官私妨闕臣竊聞得壽州正是出米之地全藉此一陂舊來陂水若滿常無乾旱是以縣名安豐蓋取此義臣欲乞朝旨直下本州委知州通判親往陂上和度開治渾河令水渠深快于渾河內築隄闌水入渠注滿陂內高築陂岸及重開掘陂內淤淀之處令稍深闊其工亦不甚多只乞就來春農隙之時少借隣縣并本縣人夫三五千人約工一月可見次第如陂水滿足則溉田萬頃永無凶荒兼得陳穎至京都一路官私米斛有可供應取進止

言三路邊防七事

〔案〕歷代名臣奏議係慶歷三年祁知禮部郎中知制誥時上

臣聞病者療之未危火者防之未燃若已危已燃雖有嘉醫力士猶不能振殂爛之苦是以思患預防所

趨一焉。臣伏見河北河東陝西比年騷困，契丹規掠塞下，求索賂遺，陛下以天下爲心，屈己忍忿，與之通好，心紓倉卒之急，是以河朔生靈晏然暫寧。此陛下權時之宜也。夏賊逆命，襲金明，殘麟府，破任福，敗壞多殺，吏卒數十萬轉食屯兵，于今五年，士氣喪沮，每聞金鼓之音，皆股戰膽銷，有百走逃生之心，無一前鬪死之志。部署鈴轄，位均勢侔，不相統一，賞濫而不實，罰弛而不行，上下相蒙，微一切之幸。臣計二陲之變，比病與火，可謂將危而且燃也。中外有識，無不寒心。臣愚以爲不速興而救之，事一差跌，悔無及已。伏見中書門下樞密院，日入奏事，遵奉常體，但以官吏差遣，使臣遷轉，比例高下，計較錙銖，下至百司冗屑，申請無不關白聖聰，及宣敕行下一署，曰聖旨。至于邊境措置，安危大計，反不暇及之。臣愚無知，竊以爲過。夫不當行而行，是爲徒行；當憂而不憂，是爲必憂。今耶律君臣包禍就毒，故馬放陰山之下，待隙而動，彼其旋玩河朔，如股掌之上，責貸不已。又將責地，禍根疊萌，章章如此。朝廷忽而不防，未知何謂耶。方今河北河東，不澄濫官，不閱冗兵，帥之才不才，未嘗擇，械之可用，不可用，未嘗選，自敵使繼至，便謂信誓可憑，謀臣高枕，了無爲備，可謂發篋啓箴，以待寇攘。今陛下盛德清明，大臣方正協力，豈可弼違，朝無間言，不于此時，側席嘗膽，思所以禦之之術，急除弊政，圖刷大恥，乃欲優游自暇，日安一日，待病之危，待火之燃，救不晚乎。夫倖口難務，非宰司職事，假令此等一皆不問，委之有司，尙無繫于治亂。若二敵窺變，更相影嚇，一出于北，一擾于西，國疲于轉輸，一夫餓斃，輿爲盜賊，憑高呼叫，環數百里，則天下安危決于一日。

之間。推是而言。臣所謂不當行而行。當憂而不憂。果可信也。劉平石元孫輕脫寡謀。徑與敵鬪。師收身死。損辱國威。今之爲帥。不寧前失。尙守舊體。終無改更。其出師也。無鼓旗。則號令不行矣。其戰也。無行陣。則敗走不救矣。其止無營壘。自守。其行無輜重。自隨。烽候不明。間諜不設。不量人事。不察地計。擱于其脇矣。臣又願陛下詔中書樞密院。自今以往。取有司申請。不干大事者。許依唐時堂帖之比。直令堂判院付之。有司雜務。已有定例。便行不奏。其可以蠲除歸有司者。定爲永制。俾之奉行。若其大事。非臣下可得專者。然後奏請。自然綱提領攝。事亦希簡。使大臣得專邊境。盡慮金革矣。諸路部署以下。出兵之日。臣願依軍法。以一階一級。交相統制。令一則易行。官專則有威。無令貴臣監軍。牽制其內。將之與士。既相習熟。則不可數爲替改。使得恩結其心。威統其遠。緩急與之生死。乃可爲用。此其畧也。昔楚莊王區區之諸侯。蹢躅卑溼之地。無日不討軍實而數之。其戒于國中曰。人生之不易。禍至之無日。用能服鄭宋。抗強晉。威震中原。況陛下擁四海之富。攬天下俊乂。與之圖事耶。然時哉時哉。不可緩已。臣愚竊不識禁忌。惟陛下哀憐省納。

減邊兵議

〔案〕歷代名臣奏議係慶歷中祁爲翰林學士時上。

臣本書生。不當妄言兵革。但以事勢料之。參驗今古。有灼然易了者。敢爲奏請。臣伏見自古以來。防邊守塞。未有屯結兵馬。經年亘歲。常在城砦。無有休息者。傳曰。久暴師。則國不足。雖有智者。不能善其後。只如

秦漢時與匈奴更相酬報出入鈔掠亦是兵罷卽歸不令屯結亦不如聖朝長令兵馬守備邊上既不出攻坐費糧運是故用兵未及六年天下之財已告匱竭良由邊將不知休兵朝廷不授成算億萬之費耗散而不計若更十年未知多少財用可濟其艱臣請言其驗敵界自三月後馬瘦放在草野不能負重關陝人皆知之則背春向夏敵不能大舉其驗一也敵無餽運每人漢界常因糧于中國中國自三月以後纔有麥熟其餘禾稼未成無糧可因敵不能大舉其驗二也又有高山大川溪谷相銜春夏之後雨水時行霖潦爲阻敵不能大舉其驗三也是敵兵銳于冬令而屈于春夏其勢可見臣欲乞朝廷詳度許令于沿邊州軍城砦每年自三月後抽減一半兵馬入內地州府就糧直至九月卻往元駐劄處號爲防秋況所抽兵士雖在內郡其校習訓練一如邊上此乃事之至便不足多疑一則邊上州軍愛惜得年支糧草二則兵馬有休息之時三則兵士到內地州府易爲襄費四則關陝之民免得轉般糧草是邊上一年支準可展爲二年也識者必難臣曰敵知朝廷自三月後抽退兵馬必選擇壯騎精兵出人不意入來漢界作過恐大段深入鈔掠人民破蕩城砦何以爲備臣對曰假如敵人有壯馬精兵能于盛夏入漢界作過三五日只是鈔掠得界上些小熟戶人民且無糧草可食彼又不會攻打城壁朝廷但只令所在城砦堅守不出兵及州軍只增城立柵相對不與之戰則見在一半人馬已是足用萬一敵人竟敢謀深入卽令內郡就糧兵馬旬日內可以勾集令大將將數萬之兵結陣徐驅往彼救應亦只令硬砦相持勿與彼爭

鋒使之進則不敢退。又粘逐常擇便地自逗留。至二十日以上。彼必有糧盡。或雨水之阻。又何能破蕩城寨。大段深入也。但自來朝廷不肯明下成算與邊將。令抽退兵馬。是以邊將畏避責罰。長要占留在邊上。圖常有準擬。其添到軍馬。以死固執。無因肯減一人一騎。今若朝廷明降成算。使之遵守。如敵非時入界。萬一有少敗衄。朝廷自任其責。自然邊將必無固執斯議者也。伏望降付中書樞密院。子細商量。取進止。

乞專刑賞狀

〔奏〕歷代名臣奏議係慶歷中祁爲侍讀學士時上。

臣聞天子之所以能制四海。役萬民而臣之者。其柄有二。曰刑曰賞而已。洪範曰。惟辟作福。惟辟作威。惟辟玉食。臣有作福作威玉食。則害于而家。凶于而國。昔宋子罕謂其君曰。慶賞賜與者。民之所喜也。君自行之。殺戮刑罰者。民之所惡也。臣請當之。于是宋君失刑。後爲子罕所劫。且子罕纔得一柄。已爲主忠。況兩得之哉。伏見陛下恭儉仁厚。憂勞聽斷。細務小物。一更聖心。近世守文之主。未見其比。然而任用臣下。主柄外移。委棄刑賞。不自總攝。凡有所進。必待臣下之譽而用之。凡有所退。亦待臣下之毀而黜之。夫毀譽行于上。則朋黨成于下。且黨人所惡。能得陛下之法而罪之。黨人所愛。能得陛下之賞而官之。則舉朝之人。重私賞而輕公法。舍其君而歸其臣。雖欲無危。不可得矣。龍之所以能飛霄漢。入淵泉。變化不測。以風雲爲之衛也。虎之所以能搏百獸。神空山。以爪牙爲之使也。使龍失風雲。則鱣鮪等其靈。虎廢爪牙。則麋鹿角其能。君失刑賞。則見輕于天下矣。況今四夷交侵。師不用命。財匱民怨。吏以苛刻相擬。官以黨與。

相替。陛下何不收取二柄而自用之。假如罰不當辜。人猶知畏。賞不值善。人尙知恩。又況陛下之德之明。其賞必善。其罰必罪耶。魯國政在陪臣。春秋爲諱之。稱之曰盜。況擁九五之丕構。總天下之機矩。倒持利劍。以資斷制。忽洪範之至戒。襲子罕之覆轍。輕龍虎之神威。抵春秋之所諱。召襄促亂。何所利哉。比年以來。日無盛光。月行黃道。氛霧無時。河決地動。皆下侵上。上失權之應也。伏望陛下。上揆天形。俯觀人事。收威福以在手。破羣黨于私門。奮乾剛。振雷聲。行之一日。天下廓然矣。臣蒙恩深厚。不致愛死。輕進瞽言。惟垂裁赦。

乞知州轉運使三年理一任劄子

〔案〕歷代名臣奏議餘慶歷中祁爲侍讀學士時上

臣伏見比來知州轉運使未曾在任得滿三年。民間利害及簿書文移。未知次第。卻已遷換。迎新送故。上下告勞。臣不知朝廷設官。欲爲理耶。如不爲理。臣故無可言者。若欲爲理。安得用此敝法。守而不改。今審官院差遣不行。便奏請京朝官。情願二年一替。且差遣得行。一司之暫利也。遷換不定。天下之大害也。故敗國家大計。使吏姦得行。生民無告。無出于長吏數易也。臣愚以爲方用兵時。財用調度。多出于民。知州轉運使不得人。不能集事。伏望普令臺省近臣。舉知州轉運使五人。轉運使知州三人。有材幹者。以上或亦許就舉充數理三周年爲一任。不得只理三十箇月每歲轉運使索取知州功過。并自具功過。中尙書考功。考功逐旋開奏。請別近臣爲考課。使精加考較。若三考俱優。改一官。知州升大州。轉運使升上路。三考俱劣。黜一官。知

州降小州轉運使降下路二優一劣改一官二劣一優奪半年俸大約以此爲率以上徵調并舉主同坐相除其提點刑獄使者通判並比類此年考只令中書門下及審官院揀選充職取進止如何施行其優劣格臣乞差官

乞減稅劄子

竊聞山東關中京西河北去冬無雪宿麥稀種居者愁困去者流離綿春跨夏搏手無望朝廷雖切勅長吏漕運鄰粟然而財用久屈倉庫半空僅能濟軍何暇及物今州縣惟中戶以上尙且懷土以待有秋而繇役百端科率千計必不可損須出于人以臣料之私蓄有涯官用無際歲既未足民胡得安陛下若不曠然垂恩有以大慰其意則蚩蚩之衆飢弱者就死強惡者爲盜盜賊既廣討捕必嚴兵盜相拏邦國深患臣愚以爲方今艱食之際其災傷州縣且詔豫減今年秋夏二稅安集居民更令力農無失生業推主上之惠置黎人之心羣心苟和不逞自息權救時急深適事宜取進止

乞修復陂塘古跡劄子

〔案〕歷代名臣奏議係慶歷中祁爲侍讀學士時上

臣伏見邊鄙用兵以來所急者莫急于食食者出于力農而國家未嘗留心于農事天下郡縣雖有陂湖塘堰例不修營轉運使知州通判但帶勸農之名畧無其實及知州通判令佐結銜兼隄堰溝洫習以爲常亦不復知是何等語是以農困食艱通天下計之常無一年之蓄且天下無一年之蓄古語以爲國非

其國況今大兵在外。水旱難調。脫若災儉相仍。臣知國用盡于軍興。則力耕之人餓死不救。羸老委溝壑。少壯爲盜賊。貽忠國家。非細事也。臣欲望朝旨。專下轉運使。知州通判。令佐等。嚴行曉告。使于部內各按求陂塘古跡。可以利民救患者。竝令修復。量率夫力。限日計功。如能不擾村鄉。久遠利濟。竝與理爲勞績。優加酬賞。若因此取受。騷擾農人。所犯一足以上。乞追官勒停。十足以上。仍除名終身禁錮。以上如可施行。乞詳定條禁。又條制舊有五戶各一保。宜申明此條。令力農之家。五家相保。其中如有惰丁游手。不事桑柘。不勤五穀。田疇荒閒者。竝許本保中舉官司。明行科罰。遷配遠州。其勸農業者。國家每一二年。畧行優卹。或少放正稅分數。或免戶下差科月日。自然人務農業。國計必充。取進止。

乞損豪強優力農劄子

臣伏以摧豪強。惠小民。王者政教之美也。今天下力農之人。國家衣食取辦。然敕恩未嘗有一言及之。豪猾兼并之家。居物逐利。多蓄緡錢。至三五十萬以上。少者不減三五萬。滯泉貨使不流通。美食高枕。坐視朝廷財用之急。不肯以一分毫佐助公家。臣以爲此奸猾之民。皆國家所宜禁切。陛下至仁。止令入粟與官。然所得至寡。不濟國用。臣愚以爲請自京師及天下應有物力人戶。計直及錢一萬以上者。官司明諭詔旨。許令百姓各指實自言有多少見錢及他物實若干數目。先作簿抄上。然後官司普令十分中官借二分助軍錢。許于所在送納。仍各逐家給付州縣帖。開坐勅命。候將來邊鄙罷兵日。并支還象牙香藥茶

鹽許百姓任便于京師外州清算其所借到錢于逐州縣置彼處所出百貨輕齎入京付推貨務減市價收錢仍別立庫承貯以備軍須緊急如此錢稍有次序乞朝廷下詔普減天下租稅三分至一半以下以明國家損豪強優力農稱物平施之義

乞停開溝洫劄子

臣伏見景祐編勅應天開封府界宿毫曹單棣許陳蔡等州溝河逐縣令佐如能在任多設方畧勸誘部民開道通流別無時雨滄潦田苗竝許批上歷子及本處保明開奏令佐與參選注家便官臣昨知陳州日體間得諸處縣令主簿爲見有此條貫只是逐年一度差公人下鄉取責戶長等狀稱勸誘到百姓開導溝洫河道竝得通快別不滄損田苗文狀申縣本州據縣狀批上本人歷子得替日依例保明便該參選注家便官其實每年無一戶一工會開治溝洫本官亦不曾按行勸誘所有每年滄損田苗放卻二稅卻稱是外處橫水入界致滄殺田苗不是本處雨水滄潦似此不惟選人僥倖顯屬冒罔朝廷臣愚欲自今後停廢上項條貫更不行用今日以前已在銓參選乞不追改取進止

乞復符節官劄子

符契之信天子所以拱斂威重檢防邪僞其在兵賦尤重自周官鎮圭以召守牙璋以興師漢氏始與郡國爲竹使符以代牙璋光武中興禁法疎簡但以璽書發兵于是杜詩建言以爲事有煩而不可省費而

不得已。請復虎符。絕紆端。朝廷更從其議。魏晉訖唐。罔不遵用。惟五代蹙弱。州國偏近。旦命暮達。不容有詐。于是周顯德六年。始去符契。專以印章爲驗。國初受命。方事之繁。急于濫定。未暇修復。方今地大。師衆巧譎。寢萌承平。旣久。民不知戰。緩急邊陲有警。而詔文單下。誠恐細人聞牒。紆詐模寫。乘機徼幸。稽逗期會。無以察知。則國家亦當居安思危。先事立制。奪邪人竊發之便。願復符節。官以明慎。國命凡發兵百人以上。財賦百萬以上。皆待符與詔書雙下。使郡國合而後遣。百人百萬以下。則符契特行焉。據爲大信。誠有國之要務。其符之形製。乞下有司詳按舊典施行。

請募民入米京師劄子

去年江淮二浙稻收七八。而淮南饑疫之後。戶口寢衰。縣無完村。村無全戶。纔足自贍。罔能及他。惟有江浙二方。天下仰給。臣以爲京師禁旅近數十萬。三年之蓄。不可不備。去年國家垂憫南土。遴茲薦饑。減漕粟之常科。軫斯人之艱食。上恩雖美。邦計未充。且足食足兵。乃可治國。我倉我庾。所以安人。夫江淮漕運之司。輸米上供。已有定數。若更多取。則官司不供。故臣願陛下明下詔書。募民能入米京師者。倍價而糶。三分其價。一分給錢。二分則以方擢茶準其直而與之。商旅利于化居。吏卒緩于程督。如此。則倉廩實。京師盛。郡國安矣。如允所請。乞付外詳議。

讓轉左承劄子

右臣今月十八日。本州進奏院遞到官誥勅牒各一道。以唐書了畢。轉臣尙書左丞。間命警懼。不知所舍。臣自慶歷中。受詔纂修。與諸儒討論。首尾纔及六年。便值臣差任出外。雖朝廷許將史草自隨。悉力編纂。其如極邊事務。荒廢轉多。皇祐中。史未有緒。蒙朝廷差歐陽修分總紀志。與臣共力。臣任益州。日煩差使。臣督趣列傳殘卷。及移鄭州。又蒙遣編修官呂夏卿乘驛就臣商較同異。催促了當。歷一十七年。書克奏上。書成淹延。職臣之罪。至如歐陽修撰列紀志等衆篇。各有法度。方成一家。范鎮王疇以下。譏次精該。一代大典。非修等不成。臣去書局已十有一年。修撰之時。不與諸儒研確。成書之日。又不與伏奏殿廷。臣于修書之勤。十不得一二。若然。臣有稽延之罪。無編次之勤。不可與修等均賞。伏乞陛下收還臣此來恩命。只旌賞修以下諸儒。庶責賞分明。允愜公議。

景文集卷二十九

奏疏

直言對（案）仁宗本紀皇祐三年三月詔求直言是時由龍圖學士復爲翰林學士本傳作景祐中誤

翰林侍讀學士兼龍圖閣學士朱某昧死言。伏以陛下躬至聖。開大明。數引近臣。延謀急政。退托不敏。開敢言之路。日昃便坐。以須告猷。夫人君據安而念危。則終不危。操治而慮亂。則終不亂。何則。幾微之兆。成敗之端。森然前判于胷中矣。臣向已被詔。對所欲言。書聞乎上。未合明聽。陛下赦其無狀。再降德音。以欲竭盡下情。以裨萬一。願臣敢無辭而對。臣聞羣臣之所以有朋黨者何也。由忠邪不早判耳。且君子得位。必引其類。使協濟忠力。不爲私也。小人獲進。亦引其類。使扇動聲勢。不爲公也。君子指小人所引。固曰朋黨。小人指君子所引。亦曰朋黨。君子常少而小人常多。此人君所以易惑而難辨也。陛下何不質之以事。驗之以言。其言也陰賊忌害。巧爲迎合。聽之似可用。察之而無實。小人也。其言也質直塞正。多所補益。聽之似逆耳。察之而有實。君子也。又以其言驗其人之行。事與言合者爲忠。事與言反者爲邪。不黜其邪。不進其忠。則朋黨終不除矣。臣下之所以譏佞得行者何也。由朝廷之言路太廣也。夫正人能言。邪人亦能言。古者稱言之無罪者。謂有道之言也。若邪人搆虛以害有位。架妄以間忠臣。亦以爲不可加罪。則是以

言喪邦矣。且邪人緣隙投詐。寄事造姦。詆人必以難驗之文。傷人必以似是之語。使進不得自辯于主。退有以離開于君。于是正人幽憤。有功抑退。如此者。陛下雖加罰焉。可也。正人則不然。毅焉中立。侃焉正論。引古今之宜。根刑政之本。質之衆則無害。措之事則可行。不爲勢傾。不爲利奪。如此者。陛下雖加賞焉。可也。故言路大闢。而正言不賞。妄言不罰。則讒佞終不去矣。今議者皆曰。朝廷誠安。且治。臣以爲不然。夫三患未去。安得爲治。而亂之未作耳。請試言之。夫與賢人謀事。而與不肖者斷之一患也。重選大臣。而輕任之。二患也。大事不圖。而小事是急。三患也。何則。賢人必爲國計。而不肖者專爲身謀。爲國計者。必恃至公。故言直而援少。爲身謀者。專挾己私。故喻巧而援多。人多不能察之。則姦詐行矣。于是言長利者。則破之以小害。使終不能爲利。圖大功者。則急之以近效。使終不得立功。善令方下。而謬令移之矣。公議始行。而私議奪之矣。且不肖之人。已不能忠。而忌人之納忠。已爲不善。而能敗人之爲善。改白作黑。以是爲非。若朝廷已知其姦。不能斥去。郭公所以誠亡也。已知其賢。而與不肖者竝任之。劉向所以獲罪也。此方今患之最切者也。夫大臣左輔右弼。參贊權綱。朝訪夕對。彌縫漏闕。旣以爲忠。且賢而擢之矣。材且謀而任之矣。是宜待之以無貳。責之以一心。今或指纖瑕。采飛語。小則被疑。大則賜罷。朝爲皋夔。暮爲構杌。遂令家無全節。人無完行。何其有道之世。而賢者之乏耶。誠任之失其理矣。徒使繼至者瞻前畏後。儻合收容。事存形跡。日防猜阻。舍國事而不慮。苟身謀以自安。大臣如此。陛下何須賴焉。且君視臣如手足。彼將以手

足爲報。君視臣如路人。彼亦將以路人爲報。此患之次也。聚天下莫急于財。鎮天下莫切于兵。制四夷莫神于機。任天下莫謹于官。今財已匱而不肯計。兵甚冗而不能擇。機至而不敢謀。官濫而不知選。而執事者但且計小利害。責小經費。羣對而旅前。取旨而奉行。日徇一日。歲偷一歲。陛下又不念此。寧是朝廷福耶。此患之又次也。假如萬一邊境有事。盜賊相挺。甲兵宿野。寇發在路。此時三患不去。誰能出身爲國。與陛下共處安危耶。誰能執節抗慨。爲陛下前死不顧耶。臣故曰。非能治也。直亂之未作耳。陛下詔中書門下。使擇天下之冗官。澄清流品。詔樞密院。去天下之冗兵。寢明紀律。斷自宸慮。必取成功。不使渙汗。復收。匪石中轉。則縣官之財有數年之饒。爲萬一不虞之備。策之善者也。機制夷狄。臣前對已言其之。猶有可念者。臣聞馬者。兵之大也。邊庭之所以常取勝中國者也。今監牧弗謹。特蓄無課。而自蕃入中者。既有定價。則馴駿不至。而疲驚實來。地非所宜。死者如積。河南河北。草地數萬頃。爲郡縣所侵。挑田伐樹。半人民產。且中國之兵。步多騎少。騎兵利平。步兵利險。夫自河以北。地若砥平。日與天盡。不見堆阜。此非用步之利也。雖步卒百萬。詎能抗戎馬之出入乎。故莫如養馬。與之馳逐。則契丹懼矣。夫馬政修舉。牧養得人。五年之中。可致良馬十萬。外可以罷西邊之入中。令得與民通市。內可以侈人心之馳突。與契丹爭衡。此誠用武之急也。臣又聞南方鎮治。地寶不乏。但轉運司與州縣莫適爲謀。昔之本錢數十萬。慶歷以來。爲官司侵耗盡矣。今既無糧貨。不能聚人。上下掩閉。止以坑穴不發爲解。采鑿烹煉。反爲奸人所盜。利奪于

下貨失于官。禁帑之錢。日朘月削。今若留數十萬緡。置于饒信。權爲本錢。精擇材臣。委之經度。自令舉吏。專建官司。庶幾銅溢于山。錢流于府。此可以責數年之效。未可取驗于目前也。銅足錢多。此亦富國之一助耳。臣智識庸暗。不足上當清問。輕率狂狷。惟陛下裁貸其誅。

論羣牧制置使

臣伏見舊有羣牧使。令以樞密院一員總領。臣以爲國之大事在兵。兵在馬。今但以兩制以上。領羣牧使。其于小臣浮議。易爲更易。若樞宥大臣兼總之。不惟要見國馬登耗大數。準量騎軍所用。又免小臣狂妄議論。所貴牧事寢重。速致成效。

論復河北廣平兩監澶鄆兩監

（案）歷代名臣奏議係嘉祐六年祁爲羣牧使時上

西北二敵所以能抗中國者。惟以多馬而人習騎。此二敵之長也。中國馬少。又人不習騎。此中國之短也。每至敵來作過。則朝廷常以所短禦所長。是以十戰十負。罕有勝理。今議者但欲益兵破敵。不知無馬且不能爲兵也。用兵七年。終不開講牧馬之制。此寧朝議未之思乎。今羣牧司管河北凡十監。其五監畜孳生馬。五監畜大馬。然未嘗有數登十萬匹者。何其弱也。今河北洛衛相北京五監之地。皆水草甘涼。可以蕃息。但官非其人。不能盡法牧養。何者。馬數雖增未之費。馬數雖耗未之罰。急則括買民馬。苟以充數。既不可用。徒有芻秣之費。驅之邊境。未戰而凍死者十八九矣。又聞河北洛州廣平。舊有三監。今惟一監存。

焉。欲望朝廷差有智識近臣。按求舊地。復爲三監。澶州舊有東平監。水草地氣與洛相一體。亦可興復。此二監合河北五監。通爲十監。每監以一萬匹爲定額。如國家牧養得人。則五年之間。可以自養及額。餘數則可以分入河南鄭許西京三監。及在京驛驢院天駟天廐諸監坊矣。同州沙苑一監。地尤宜馬。令卻只畜大馬。不令孳育。殊乖所宜。欲望朝廷許將孳生馬五千。就沙苑分左右兩監。委官益占官地。謹加牧放。五年之間。亦可得數萬。七年之後。可支陝西緣邊諸州戰馬之闕矣。

又論京東西淮北州軍民間養馬法

河北陝西河東出馬之地。民間皆宜蓄馬。而近年黔中土兵已多。耕農數少。難行民間養馬之法。伏見京東西緣淮北州軍。地不純熱。馬之種類與北馬小異。若令民間養馬。朝廷緩急差可濟用。臣今略爲養馬法如下。

一、民間能養馬二匹者。免半丁科率。三匹者。免一丁。五匹者。免二丁。仍州縣不得尋常專擅差借。其有第一等第二等二戶全無丁者。勒養馬三匹。一丁者。勒養馬二匹。其力及一丁養馬戶。比有丁養馬戶。免一半科率。

一、所養馬州縣爲立籍。許令提點刑獄與知州一歲一閱。以知實數。如有死損。仍委本戶置買及數。一、民間如有力及人戶能養馬及十四匹以上。其戶下科率十分與免七分。

一、所養馬不得夾帶川蜀淮馬至小怯者充數，竝須堪任負載者。

論養馬劄子

（孝）歷代名臣奏議以下四首俱係嘉祐六年祁爲舉牧使時上

臣等近知河北羣生諸監馬例各低小不堪戰陳。蓋自來馬種雜亂，或翁大母小，或翁小母大，配放時不曾揀別，是致無由生得高大好馬。實恐緩急有誤，諸軍分配。昨有判官寇平因點印時，曾揀好翁母馬七百餘匹，送淇水第一監別立羣分配放。已準宣命施行。續據都監李知和乞于逐羣內揀出五百匹大馬，破草養餵，好母馬配放。又蒙宣命許依。臣等參詳，逐官各見用心揀別馬種，然終是未得盡善。今欲乞將羣生監與一例分作二等，其骨格高大堪充戰陳者爲上等，骨格低小有諸色病名者爲下等，各別立作羣分配放。仍今草地相遠，不得交相混雜。如此必生得駒口格式入等，堪任披帶。至于雜馬亦自無闊用。其自今以後生得駒子亦便依此揀別。各歸等第。內上等馬翁竝乞依寇平等奏請。于不配放時破草料上槽養餵。所貴及時遊放，不至羸怯。兼臣等不住將諸州上京馬內揀選迭格好翁母馬小作番次逐旋差殿侍押赴諸監。如此分開等第，不出三年，必須大改收得迭格駒口，以備戰陳，取進止。

又乞養馬劄子

臣頃年爲羣牧使，其時曾壁畫欲于諸監市母馬，合見馬共成五七萬匹。一歲大約得駒五萬，不出五年得二十五萬。就中破死損十分之二，得駒二十萬。于二十萬中選出負馱馬十分之五，得戰馬十萬匹。以

爲中國有此馬。可與敵人相馳逐。使聞風畏威。不敢有窺邊境。意是時西事已定。朝廷求安。便忽畧此事。有司指擿臣奏。以爲迂闊。但言放牧之地。侵損民間膏腴田疇。有損無益。于是寢廢。且馬者兵之本。倉卒求之不可得。若無事時。歲月孳養。臨事自無闕乏。臣欲乞選左右名臣。議羣牧養馬法。收還牧放舊地。多列廐房。檢詳新舊條約。擇取便宜。如臣所請。且爲新制。及罷河東陝西馬禁。許民間與蕃落自相貨買。及許天下民養馬。勅州縣不得計在貲財之限。其牧馬。臣且以十年爲期。若歲歲孳養。當得二十萬匹。而天下百姓所養馬亦益多。假令西北二邊敢爲風塵。則我兵足馬健。與之角戰。誠不足畏。取進止。

帖黃云。今天下馬軍。大率十人無一。二人有馬。而所習技藝。與步兵不同。緩急不堪移充。步人使喚。使軍人無馬。是國家虛養此兵。有名無實。又云。臣舊知牧馬數不多。于中選取戰馬。卽今數目益少。此事最爲用兵切務。伏乞朝廷深以爲意。

論買馬劄子

河北孳生監馬母數少。逐年有妨孳配。勘會麟府州馬最宜孳生。准先降條貫。其馬作五等收買。第一等一十八匹。端至第五等。各減一匹。後來宣命于逐等上例。各減絹二匹。第一等馬見今只有十六匹。端。蕃漢與販人戶別無利潤。致驃馬轉少。竊恐諸監每年漸見孳茂闕額。有誤將來支配諸軍。本司今相度。其麟府州所置五等驃馬。欲乞權于舊條未經減絹收馬五等價內。將第三等以上。各特添絹二匹。第四等

五等各特添一匹。仍令逐場買馬及三五十匹。旋計綱上京。赴估馬司交割。從本司再行揀選。分爲好馬雜馬兩等。轉送孳生諸監。添助蕃息。臣等又見漢武帝時。爲將軍騎馬少。乃令天下諸亭養馬。歲課孳息。卽知權宜立法。古今一體。如將來諸監母馬數足。卽卻依元降條貫施行。一則招來興販人戶。將好馬中官。二則三數年內。孳生駒口漸多。準備緩急支填。戰馬無闕。取進止。

又論配馬劄子

階文州買到省馬。舊來牽送上京。近因本司壁書奉聖旨。竝令送陝西轉運司支配諸軍關馬。伏緣今來孳生諸監關小上等馬。翁馬母蕃息駒驪。本司相度欲乞今後階文兩州買到第一第二等馬內。如有迭標格好結裏及事藝別無病名。堪充作馬翁馬母。委自本州長吏躬親揀選十歲以下者。令依舊押送上京。于估馬司交納。從本司填配諸監。其餘揀退不入今來色額者。自依近降條貫施行。取進止。

議西人劄子

臣伏見趙元昊遣使進納誓書。西人在館。以待答報。伏知朝廷議欲降詔。遂相開納。止留冊命。未便舉行。又聞俞青使回北庭。謂本朝若必行元昊封冊。勿令使命深入。恐契丹兵馬一例殺傷。又其答書有俟平定西鄙遣人來報之意。此皆含糊未決之辭。包紆蓄怨之語也。臣愚不敏。不知大計。竊謂機危之會。理須審思。事脫一失。悔將難救。且西北二敵。連兵構難。中國之利也。方當整勒兵馬。陰拱高視。候其大傷小亡。

乃可以逞。今若便許元昊同其誓文。則二國要約固已先定。不待封册方正君臣。如此。則元昊之貢獻必且續至。朝廷之金幣亦便頒分。假使北敵能勝西。則契丹必歸曲朝廷。以爲撫彼叛臣。逆其來信。負力悻慢。勢必稱兵。而元昊得朝廷誓詔。必且取重外鄙。市怨耶律。肆其狡獪。因爲間諜。得我金幣。以救敗亡。是乃紓敵禍于一時。嫁外怨于中國矣。使西能勝北。則二敵之怨必深。契丹士力更當饕餮。則朝廷卻與元昊歡盟厚賂。安得不動敵情哉。契丹之怨朝廷益深。則元昊之結朝廷益固者。非謂與我爲金石交也。彼藉我之賄。假我之援。全境激敵。以誓刼我。使吾邊戍束手瞪目。熟視流散。不得侵畧。然後首鼠窟穴。養成豺虎。斯其謀也。臣又料契丹未能得志于元昊。先且取償于河北。避強擊弱。有何不可。是朝廷免西鄙之小衅。結北方之巨釁。輕重之擇。安得不懷。且契丹言恐一例殺傷。又云俟平定西鄙。此何等語。朝廷忽而不計耶。臣伏見元昊誓書中。要結天地。誓及子孫。言雖夸險。勢亦窘急。何者。彼蓋迫契丹之用兵。畏我境之乘便。畧其邊塞。取其老小。重以詛誓。務在速成。必知朝廷已賜開許。不肯先違信誓。則彼一心捍北。永無東顧之虞。此賊吳之計。事在目前。確然可辨。臣以爲當今計者。不如且遣彼使。賜以存問詔書。詰難誓文。更令修正。遷延來往。以陰後期。兼令雄州騰報北帳。俟其雄雌之決。更議拒納之宜。撫西懷北。兩得其便。伏望畧回聖慮。一賜裁擇。取進止。

乞宰相監修唐書疏

（案）歷代名臣奏議。係仁宗時祁祁知成德軍時上。

臣先奉詔修定唐書。是時賈昌朝罷執政。丁度以參知政事。嗣總其任。度比罷免。而書局不解。今度不幸薨謝。臣又遠守邊郡。本局止有刪修官王暉以下四員。至今編纂遲延。紀志俱未有草卷。誠恐書無統制。諸儒議論不一。淹引歲時。欲望朝廷許依前例。以宰相監修。竊以一王大典。垂法千古。今功且垂成。而其間褒貶是非。出史臣等。須藉當國大臣。商榷訂正。爲斯文之重。庶書成行遠。無愧前人。唐時修晉氏一史。亦宰相恭總。彼偏方陋國。制度殘窳。尙以輔弼領之。比今唐書。恢大光明。爲不侔矣。伏乞特賜詳度施行。

請復唐馱幕之制。(案)歷代名臣奏議係皇祐四年鄆知成德軍時上。

臣聞唐時出師用兵。每什爲五馱法。馬牛任從所便。其間隨行什物鍋幕之類皆具。故師行萬里。經亘歲月。無所闕乏。自五代之亂。更相侵擾。其兵不出中國。弱者輕齎。強者因糧。遂失五馱法。至今相承。不復討尋。臣伏見朝廷之制。每指揮五百人。指揮使得夾幕一具。副者得單幕一具。馬軍得葉鍋布行槽等若干。步軍得鍋若干。自軍員以下。更無帳幕。或出次野外。雖甚風雨。亦無所庇。又戰士被甲。所將衣衾。悉自負荷。馬軍則孟杓之類。悉在馬上。然則行數百里。人馬強力。皆已先疲。脫若逢賊。安能挽踢擊刺。與爭勝哉。故無幕帟。則士卒無所休庇。無馱物。則士卒須自負荷。此于軍戎。亦非小害。臣乞詔近臣。檢求唐馱幕法。下殿前馬步軍司。議可復與否。明條利害。上稟朝廷指揮。

論復監地必有羣臣以百姓稅地爲言

國家今廣置騎軍。而無馬給之。騎軍所習。既不可爲步。則是數十萬衆。無所施用。常坐費糧廩。而與無軍同也。臣固以爲不如復監地。多畜戰馬。以給其用。計之便者也。凡監地有及千頃。五百頃者。其間附山包野。陂澤菱草。非耕種之地。今若復之。則羣臣浮議云。害百姓良田。使農不得耕種。臣以爲不然。假使牧馬之地。一監有五千頃。皆爲稅田。國家所收。歲未及數萬石。以數萬石之粟。于軍之虛實。未有所益也。使有牧馬數萬匹。則三軍之氣。可以坐增。由是言之。國家急須軍馬之時。雖良田尙可變而爲牧地。況今之牧地。非盡良田者乎。臣伏見洛陽單鎮兩監。曾廢爲民田。議者知皆以地之肥美。及經一二年。民之佃不及一二百頃。其餘盡爲荒野。無人請佃。牧地之中。樹木數千萬株。皆爲百姓所伐販賣。而官司明知。上下相蔽。不爲糾發。俄而卻復。此特倖人邀一時之利。議者之過。此則監地興廢之一驗。事已見前。惟國家詳酌而行。

上使宜劄子〔案〕歷代名臣奏議係皇祐五年祁知定州時上。

右臣伏念行年五十有六。素自衰怯。不逮人。宜內治一郡。習刀筆簿領。計校米鹽。與俗吏爭課最。以報萬分。不意陛下過聽。乃使守邊居真定。不半年徙定武。任過所能。早夜震惶。然常聞天下根本在河北。河北根本在鎮定。以其扼衝要。爲國門戶。且契丹所欲得者。惟定與鎮。二軍不戰。則進薄深趙邢洛。咋脆撞虛。無有患矣。臣所以日夜深計者。以爲欲兵之強。莫如多穀與財。欲士而練。莫如善擇將。欲人歆豔樂鬪。莫

如賞重而罰嚴。欲敵顧望不敢前。莫如使鎮重而定強。夫恥怯尙勇。好論事。甘得而忘死。河北之人。殆天性然。陛下少勵之。不憂不戰。以欲戰之士。不得善將。雖鬪猶負。無穀與財。雖鎮金城。定湯池。勢必輕。今朝廷擇將練卒。制財積糧。迺以陝西河東爲先。河北爲後。非計也。夫西戎兵銳士寡。能畧邊。不能深入。河東天險。敵憚爲寇。惟河北不然。失長城之防。自薊而南。直視千里。敵鼓而前。如堯枉上行。故曰。謀契丹者。不得不先河北。謀河北。舍定與鎮。無可議矣。故臣願先入穀鎮定。鎮定已充。可入穀餘州。列將在陝西河東。有功狀者。得遷鎮定。則鎮定重。天下久平。馬益少。臣請多用步兵。夫閭然聚。霍然去。雲奔颺馳。抄後掠前。此馬之長也。強弩巨槌。長槍利刃。什什相聯。伍伍相遮。大呼薄戰。此步之長也。臣料朝廷與敵相攻。毆而去之。及境則止。然則不待馬而步可用矣。臣請損馬而益步。故馬少則騎精。步多則鬪健。我能用步所長。雖契丹多馬。無所用之。夫鎮定一體也。勢不可離。今判爲二。恐謀之未詳。自先帝爲一道。帥專而師不分。故定搆其智。則鎮擣其脅。勢自然耳。今其顯顯有害者。屯塞山川要險之地。裂而有之。平時號令文移。不能一敵脫叩壘。則彼此不相謀。誰肯任責耶。臣請合鎮定爲一路。願以將相大臣領之。無事時以鎮爲治。所有事則遷治定。指授諸將。諸將權一。而責有歸。無苟且意。策之上也。惟陛下與中書樞密院。當居安慮危。熟計所長。必待事至而後圖之。殆矣。河東馬強。士習善馳突。與鎮定若表裏然。東下井陘。不百里入鎮定矣。敵若深走。以河東健馬佐鎮定兵。掩契丹之惰。若歸者。萬出萬全。此一奇也。臣聞事切于用者。不可

以文陳臣所論增步兵及入穀分兵隸裨將等諸條。件目繁碎。要待刀筆吏委曲可曉。臣已便俗言之。輒別封上。至擇善將。多蓄財。乞委樞密院三司條具以聞。臣一諸生。弗知軍旅事。偶有所見。不敢隱。特以受大恩。思亟報也。恐議涉迂暗。有司疑詰。更乞付臣。令悉意條陳。然後施行。

景文集卷三十

奏狀

繳進升祔慶成詩狀

右臣等伏見今月九日章獻明肅皇后章懿皇后升祔真宗廟室禮畢者懿烈順躋慶儀交展恩流即日歡懌縣區恭惟皇帝陛下凝命宅中協華稽古雖誕敷于一德常有懷于二人向者闕寢別祠翠華躬謁依違累歲博徇羣臣之謀稽合靈心用舉先朝之舊制書前降典冊嗣宣遂自儀坤之廷竝升清廟之祔緣情得禮因孝示人回曠蕩之洪私顯劬勞之永報鑑益易具交深顧復之思牲俎薦芬足慰蒸嘗之感臣等共塵法從參攝事經仰欽陟佑之儀難默揄揚之素謹各撰成升祔慶成詩一章繕寫別封上進干冒宸覽無任省循媿汗之至

南郊乞異姓恩澤狀

右臣幸班禁近獲遵光華凡再侍于明禮得推恩于異族敢援新制以寵私閭伏念臣有舅進士朱某幼習藝文世承紱冕未預鄉華之薦久懷家食之慙以臣永歎渭陽希榮母黨願簞仕途之籍以光孝治之辰誓罄涓埃共期酬補

南郊陳乞男彥國恩澤狀

右臣籍塵祕禁。身託近藩。天饗在辰。職來預慶。緣從官之舊比。有任子之公條。輒忍視顏。更申妄請。竊以臣男彥國。甫當蒙孺。粗訓義方。未專一業之勤。遽覩千齡之盛。不能自達。庸丐賞延。幸當朝霑之覃。冀預士名之食。儻榮于嗣。獲寵而家。願交勵于朴忠。得參酬于覆育。丹懇所誓。殫踣無忘。干冒宸嚴。臣無任震惶俟命之至。

乾元節乞男定國等恩澤狀四首

右臣叨華禁從。逢聖誕期。輒丐餘榮。更延賤息。伏念臣有男試。將作監主簿定國。久踰冠齒。粗習儒猷。向因臣兄以猶子之親。得參士食。逮臣蒙持橐之列。已及蔭條。顧緣試秩之初。未齒爲真之籍。敢因盛節。就冀仁恩。庶獎穉蒙。益敦義教。省身可勉。收報爲期。

右臣叨服近聯。慶逢誕節。例容任子。情切庇私。內揆干踰。舉臻震懼。伏念臣有男試。將作監主簿靖國。甫當羈卯。纔習藝文。向緣世父之榮。已參蔭籍之末。逮臣冒寵。自獲推恩。敢因星渚之辰。更丐童衿之幸。許從眞秩。俾獎蒙姿。誓忠教之日勤。答上天之仁覆。懇恩內勉。殫越爲期。

右臣久玷凝嚴。訖無云補。尚因誕聖之日。敢援任子之條。仰竚恩華。俯私祗愛。竊以臣男惠國。年方齔佩。習始書觚。未克辨經。稍任典謁。屬羣臣之上慶。願賤息以自憐。距躍所逢。推求例賞。儻童蒙之繫志。獲藉

策以開榮。共勵竭忠。歸酬再造。

右臣久塵法從。均服朝禱。每緣慶于誕辰。許推慈于蔭籍。內惟丐請。有惜情顏。竊以臣男輔國甫在童羈。未從傳習。雖教之執卷。而未能負薪。不勝私懷。願從舊食。幸電樞之紀節。徧荷囊以頒恩。冀啓任階。以獎家訓。如牛舐犢。幸慰于哀悰。雖犬若豚。敢期于有立。共圖忠瘁。上答恩仁。

讓翰林學士狀

(案)本傳。祁以龍圖直學士知杭州。留爲翰林學士在慶歷三年。

右臣今月十三日。準閣門承受韓文昭報告。爲已除授臣翰林學士。今授告敕者。聞命側躬。既榮且駭。竊念臣昨知制誥日。以經夏抱疾。願守便藩。本冀寧居。得養羸喘。俄叨改職。尋以敝辭。比令兒息。搬取家屬。伺其歸室。偶未赴官。僚友具知。宰府同亮。今者。忽蒙誤選。升備禁扃。文翰近班。臣子至願。當不俟駕。即日造朝。但念臣因病自言。蒙恩輒止。不惟欺冒朝聽。必恐滋致人言。便謂臣巧作遷延。陰規次補。有妨賢路。專取身榮。啓偷競之風。瀆承平之化。一罹斯謗。容得自安。伏望皇帝陛下。察臣外補有因。亮臣知分有素。且依前詔。早遣出麾。況餘杭闕官。已逾三月。學士供職。自有數人。若得申沛俞音。收還新命。憫孤蹤之羈。悵息浮議之紛囂。上穆朝僉。下紓憂悃。雖停襃澤。自荷大恩。無任祈天俟命戰懼之至。

再讓翰林學士狀

右臣今月十五日。準中書劄子。以臣陳讓新除翰林學士告敕。乞且赴杭州。奉聖旨。不得辭讓者。恭聞敦

敕參抃誠惶。貸其輒辭。勸以嚴旨。便當奔走朝路。冒卽寵章。誼有未安。不容無訴。伏念臣今年三月內。以天章閣待制歸朝。尋蒙改知制誥。又于七月中。因陳乞外郡。蒙轉龍圖閣直學士。無勞被獎。自臣爲始。尙錄餘杭舊例。未速人言。臣是以上殿敘辭日。乞在任滿二年。成三十月。依常參爲例。冀圖考績。少答容私。不意今者再被制書。擢臣爲翰林學士。此則一歲之內。三次遷除。締典蕃數。未有臣比。一介之操。知分甚明。若使懼命忍慙。覲然祇受。悠悠仕子。偷競同興。雖微臣苟一日之榮。而廣朝被多士之議。損大益寡。顧不重哉。今拒詔當誅。昧進亦罪。罪無足憫。誅有可矜。敢率愚誠。罄敘茲窘。伏望聖慈。特許收罷新命。且令赴任杭州。控仁援天。更無別理。如朝廷必以學士院乏人。不令辭免。則臣願只以內閣職名作直學士院供職。俟滿年歲。方冀敘遷。二事之中。乞賜矜允。臣無任虔祈懇禱之至。

審刑院斷絕公案奏狀

(宋) 祁知審刑院。據神道碑在慶曆四年。

右臣據大理寺狀。申日奏司。今月日以前。送下公案。竝已斷奏。訖無見在者。舜刑惟恤。漢讞號平。屬九夏之清和。訖四方之論報。至仁不治。中典著聞。允非甚盛之期。疇臻幾措之會。恭惟皇帝陛下。燭知治總。懋建民彝。受支日之奏封。謹齋居之閱實。軫人命之重。容有不經。詔天下之平。許從中覆。至于法防素具。吏禁易遵。示以簡孚之嚴。望其旁緣之隙。懿條交舉。庶獄寢希。甫當時燠之初。靡餘決事之請。畫冠斯格。本上德之好生。丹筆屢停。顧攸司之何力。臣誤膺審克。祇覲熙隆。願咨紫月之文。備著約章之簡。聿光在宥。

永照方來。

謝對衣金腰帶鞍轡馬狀

右臣伏蒙聖慈。以臣加前件職。特賜對衣金腰帶一條。金鍍銀鞍轡馬一匹者。經幄詳延。甫塵于祕職。規庭需賚。更藉于殊私。內撫肝膈。舉臻榮腴。竊以解衣示寵。莫美于漢臣。錫馬從遊。最榮于唐世。而臣仰丁盛旦。早服華階。因擢句之備員。侈除書之在始。方其伏謝。敕以頒分。煥紋襲于翟裳。爛鏤環于指帶。材駒半漢。釘轡玲瓏。惟賜予之兼常。實芻微之增詫。誓當夙夜祇力。造次爲仁。俯觀珮璫之長。參惕乘軒之貴。有如皎日。無忘茂恩。

又

右臣伏蒙聖慈。以臣入院。特賜衣一對。金腰帶一條。金鍍銀鞍轡馬一匹者。近司被召。錫品需華。祇受寵頒。叢臻婉緒。恭以命賜之設。眷厚是將。安吉美于詩人。蕃庶表于侯象。洪惟聖世。務尙前猷。美禁署之始除。煥儒林之新式。因其衆謝。侑以多儀。簡服裁鮮。鑲金飭具。斥衛鞍之寶鉸。解材駟于天閑。下拜神墀。爛盈私室。而臣猥從未至。甫望清光。視書詔以未能。假器章而太甚。人斯誤舉。已無收汗之期。賞復冒叨。安道濡鵜之詆。誓堅盡瘁。少答詳延。

又

振擢云初。頒分有典。恩雖將意。婉不容顏。伏念臣久去嚴深。弗專辭贊。蒙收還于玉署。復修潤于綬言。而怡儼塵容。支離病骨。謀無故勇。貌有新衰。方深舊貫之慙。更修多儀之貶。襲衣聯緒。梁帶橫金。侑以材駟。副之寶鉸。雖朝稽成式。本優待于峻良。而士有冒居。迺例蕃于錫予。仰循異渥。內揆無堪。服以光軀。慶揖私之有煥。乘而致寇。惕觀象以蒙譏。荷寵兼常。撫衿充感。

又

右臣伏蒙聖慈。以臣前件職。特賜衣一對。金腰帶一條。金鉸銀鞍轡馬一匹者。修袂光軀。寶釘照筓。斥內閭之半漢。副釘鉸之精良。併侑茂恩。庸褒近職。胡寧輜情。遂忝頒分。伏念臣本以避親。特蒙換秩。始踐鳳阿之祕。方陳鼎藻之歡。而朝循舊章。賜存成式。匪爲人而廢禮。姑異數以勸能。麗服橫金。爰重實行之寵。材駟耳轡。居爲執御之華。被錫于茲。撫躬何幸。儻屯愚之可勉。圖尺寸以爲酬。

定州謝對衣金帶鞍馬狀

右臣準中書劄子。以臣除前件職。奉聖旨。賜臣對衣金腰帶鞍轡馬。仍差殿直李宗偉就定州給賜者。寵名冒進。賜品臨頒。使者發齋。邦人改觀。伏念臣年塗衰遠。襟府塵蒙。違去清廂。保障窮塞。報政無日。待罪再茲。本緣假節。以非真。宜與過更。而皆罷。遇蒙皇帝陛下。垂矜久戍。特改近班。因加秩之命云初。舉有分之錫。惟舊襲衣。圍帶釘轡名駒。本三朝之餘珍。重兩轡之私駕。曳焉稱體。知露冕以非榮。乘以按屯。遂據

鞍而忘老。撫恩云厚。有殞爲酬。

讓敕設狀

伏觀仲夏以來。苦雨爲瀾。河流泛濫。民堵墊傷。上惻容襟。分馳羣禱。方交修于至德。將迎召于太和。臣比荷顧存。召還禁近。蒙循舊體。盛錫宴羞。旣親耳于焦勞。難自私于樂衍。願停慈渥。以適事宜。其敕設欲望。特許寢罷。

謝班次狀

(案) 祁于慶歷五年罷翰林。改龍圖。八年復翰林。此狀與下謝宜召皆是時。

右。臣準中書劄子。奉聖旨。令立班在張方平之上者。因舊蒙榮。沿恩進等。懇辭弗聽。婉切參懷。伏念臣術學空單。年姿衰槁。自違禁署。四易歲陰。絕窺鈴索之華。淺忘赫蹏之式。屬無嫌避。再沐召歸。合真下陳。以從甲令。而方平等。更因近例。追敘前功。屈朝次之明規。崇仕途之美讓。洊煩諭詔。俾進上聯。畏再瀆以取訶。輒忍慙而就著。以新訂故。誠非素朽之長。雖去卽還。遂竊寒人之福。仰銜垂容。曷用仰酬。

謝傳宣撫問狀

右。臣伏蒙聖慈。特降中使傳宣撫問者。冒寒得疾。積損成虛。伏枕迷魂。偃牀在告。尋交薦于惡石。冀自救于殘軀。洒蒙皇帝陛下。齒記不忘。慘矜過厚。特迂使驛。傳諭玉音。許輟高手之良。以濟負茲之困。特大恩之下屬。庶營魄之重還。自此更生。盡歸論報。

謝宣召入院狀

命節及門。褒綸在耳。踴聞振擢。交腴榮慙。伏念臣素稟朽疎。親逢昭泰。由累勤于舊史。獲通籍于從官。深入玉堂。慎司雅告。無能云補。第愿于空餐。有諉攸箴。已當于僕役。會臣兄庠。猥叨武政。例合避親。亟用請開。懇祈去職。尋蒙可報。對易美名。跋華閣以通班。仍露門之擢句。宿官少責。用拙正宜。安于之筆。遂乾絕聞。名命。裨謏之草。雖在。無復討論。適以樞務缺員。昆親補乏。垂矜舊物。靡涉他嫌。復收液櫛之材。入齒禁林之綴。矧達近密。回質寒溫。其間緣疾召衰。乘憂失壯。學殖逾落。辭緒若抽。心忘五誥之醇。目眩十行之細。曷以再承大對。參潤遠猷。深惟洊至之華。抑本千齡之會。斯蓋皇帝陛下。仁無顏覆。惠等曲成。眷去馬以還駢。激倦禽而重竊。寵光完士。散黜羣倫。尙當景式前修。繹尋故業。漢風彌郁。冀循爾雅之規。遯齒已高。況屬知非之素。撫躬揆遇。濱殞爲酬。

授知制誥舉歐陽修自代狀

右臣蒙恩授臣依前官知制誥。準敕舉官自代者。伏見大子中允集賢校理歐陽修。志局沈正。學術淹該。棲遲懷寶。不詭所遇。措辭溫雅。有漢唐餘風。如得擢在禁垣。委之潤色。必且粉澤于度。布于四方。親言實。臣所不及。願回授受。以允詳求。

授兼龍圖閣學士舉施昌言自代狀

右臣竊見天章閣待制施昌言。識遠慮遠。見推倫輩。歷司繁劇。沛若有餘。尤宜蒙三接之召。備萬乘之器。材能已試。臣且不如。願改恩章。以允朝渙。

舉楊安國自代狀

右臣蒙恩特授前件官。依舊充職。準敕舉官自代者。伏見天章閣待講楊安國。質厚淵懿。邃于經術。勸道帷幄。有裨大猷。循名責實。過臣遠甚。乞回清授。以穆朝告。

修撰舉趙師民自代狀

右臣蒙恩特授史館修撰。準敕舉官自代者。伏見尙書祠部員外郎天章閣待講趙師民。性理沈敏。恬于榮進。博記多識。殆無比倫。據經援古。措辭雅健。推名責實。臣所不如。召回甄授。稱是惇碩。

授諫議舉魚周詢自代狀

右臣蒙恩特授諫議大夫。準敕舉官自代者。伏見天章閣待制魚周詢。外和内正。不憚強禦。頃排異議。辨正誣冤。毅然風采。登于朝路。臣瞻景仰美行。心服其長。願回恩典。以光賢舉。

授翰林學士舉高若訥自代狀

右臣蒙恩除授翰林學士。準敕舉官自代者。竊見前天章閣待制高若訥。資性謹厚。文詞淹敏。值物照理。物無庾情。與臣偕第。同班稔其履尙。若擢真近署。足潤大猷。願回新命。以光清授。

再授翰林學士舉官自代狀

竊見某官志尚冲遠。風局精強。久次詞垣。晚成國器。材望既出。臣右年輩亦在臣先。願還濫及之恩。回副類能之選。

授兼侍讀學士舉張錫自代狀

右臣伏見天章閣待制張錫。安節懿行。講貫如流。進侍經席。有助咨問。願回新命。以光崇簡。

授待制舉賈昌朝自代狀

右臣伏觀先降敕節文。每授官許舉官自代者。竊見司封員外郎天章閣待講賈昌朝。學優文敏。操履堅正。質其望實。過臣遠甚。乞回茲授。以允公言。

薦劉絳狀

臣伏見應茂才異等科劉絳。生于遐遠。系出寒素。結髮從學。逮冠有成。研覃六籍。上下千載。多所論次。頗有指歸。固窮守道。不祈詭遇。向緣就試六論。文限敦促。偶因小誤。被黜有司。生平襟臆。有所壅閼。絳嘗著春秋三傳析要并皇極書。凡四十五篇。皆鉤撫幽奧。會萃異同。思排異端。取質先聖。據其揚摧。信足多尚。按絳行年方二十有五。若令齒德寢茂。藝術益深。必能擬迹惇儒。自名所學。欲望朝廷特許收試。授一直講職名。俾在國庠。敷述經旨。養成令器。進備譽髦。其析要皇極等書。謹同封。取進止。

薦張定方乞收試狀

右臣伏以良工構材爲廈。明主構士爲國。而材須求集。士待舉知。然後落成展采。功與時立。伏見應沈淪草澤科張定方。年三十八歲。識慮沈敏。氣直行範。文尙體要。不工聲病。涉知韜略。兼明遁式。甘足貧稿。久無仕心。昨爲鄉黨敦推。入應詔舉。六論程藝。非其素心。有司報罷。怡然引去。閉關卻掃。不干州閭。立言抗慨。指摘民弊。臣知壽州日。以禮致問。延至公門。觀其議論。卓焉切至。因取其所著書。得卻敵復戎戰書等篇。質多采少。紀實求當。臣亦指文案事。與相辯詰。觸機應變。籌策有餘。非但角空言。競華論而已。臣以爲如定方等輩。不可多得。或蒙召赴上都。程其所長。授一職事官。令往西北邊郡。必能研究術略。參贊帥臣。討論營陣。商榷攻守。至于撥煩幹蠱。又其緒餘。臣既知其人。不敢有蔽。謹錄定方所著三軸并封上。如有可采。伏乞特賜收試。果無所取。臣甘苟言之罪。

乞知亳州狀

右臣竊以爲君務達下情。爲臣貴在無隱。雖有煩請。猶不蒙誅。臣之敷懇。正託斯義。伏念臣福庠材下。爲祿所浮。陽年四十。便若衰憊。纏綿宿疾。出入五年。氣迕脾倉。邪客胃府。觸暑犯寒。則飲食頓減。溫中實下。則藥艾未良。自念綿疴。屢求外補。昨領壽陳兩郡。凡一歲有餘。旣便養頤。漸克強勝。不期戎帥內鎮蕃方。臣蒙恩入朝。歡喜上道。庶能自力。還服近班。適叨書命。竊華名級。而阡悴之質。果未遑安。舊痼有源。新疾

復動。春夏之際。痊劇無常。舉家竭急。時煩省問。羸露有素。班列具知。自非出守。胡能寬疾。臣伏見亳州去都至近。總務非少。亦須選任。俾往撫綏。欲望聖慈。許令臣知亳州一任。臣雖質課計最。有惡吏師。然恪奉詔旨。謹察邦政。于下流之比。尚有一口之長。幸其餘閒。盡力治料。儼蒙帝力。爲天所支。耗氣稍完。迷魂來復。尙更求自試。無憚諸煩。涓埃萬一。以圖云補。今茲祈叩。實迫疋殘。言拙少文。止冀矜遂。

乞解鄭州還京求醫狀

右。臣伏以。臣子危急。必干朝廷。祈君父。雖誅戮在前。不敢避也。伏念臣自去年五月。脾胃寒泄。服暖藥過度。虛風客熱。結成沈疴。發歇不定。經一年有餘。臣以所領州路當兩京衝要。誠欲盡瘁死節官下。是以不敢請假。牽勉勾當。偶無曠敗。昨自六月中。寒溘頓作。不復支持。經四十餘日。飲食減少。出廳不得。肌肉銷盡。惟有皮骨。左腳麻木。行履艱難。情志昏寒。委實勾當不前。遂于七月二十一日。牒公事與本州通判管勾。已奏聞訖。人情病未及死。須思治療。伏緣外州難得醫藥。坐待死亡。臣欲望聖慈。念臣從川途替歸。往復萬里。年老病甚。將就溘然。特許解罷鄭州。令還京師。就求醫藥。以救殘喘。或得一閒散主判司局。所貴易得假告。休息衰骸。萬一疋殘之軀。未填溝壑。再得陪服朝序。卽異時朝旨。別有差遣。不以遠邇。聞命卽行。以答陛下再生之賜。

景文集卷三十一

外制

王堯臣可三司使制

敕。經九咳之入。以制國用。籠萬貨之羨。以謹邦財。平時倚成。使領爲重。況邊鄙未靖。饟調亟興。舟楫所輸。項背相屬。商總用度。彌見其艱。擇才而任。僉言茲允。以爾王堯臣。器閱質茂。行淑履方。比冠烝髦。寢膺優仕。歷階詞禁。俾代予言。倬爲文章。近古風烈。向假命節。再撫西人。綏慰流庸。宣導嘉美。已試之效。有位具聞。宜旌幹蠱之能。往諧主計之劇。仍華內署。增秩左民。朕惟師興之繁。食足爲本。出納矜吝。旣付于攸司。有無懋遷。當視于成訓。圖善而職。對我茂恩。

國子博士楊文友可尙書虞部員外郎制

敕具官楊文友。慶善承家。方廉絜矩。心通吏治。志服官箴。屢關決于郡條。久逶迤于朝紱。課成有狀。賞協當遷。俾陟朕虞之曹。且光郎宿之選。

國子博士魏琰可尙書虞部員外郎制

敕具官魏琰。夫馭吏之方。責實爲效。殿旣成罰。善亦當遷。循而行之。官則無濫。以爾簪裳華緒。文牘美才。

歸輟朝紳之良。克成縣譜之治。課目來上。歲次亦周。宜由經庠。往踐郎位。服我榮典。無廢舊勞。

國子博士向繹可尙書虞部員外郎制

敕具官向繹。積慶之餘。階廕而仕。綢繆吏閤。繩俛朝榮。比倅州符之煩。且齋官簿之要。課皆應攷。歲亦當遷。朕虞之司。郎選爲重。往升華秩。無廢舊勞。

杜惟序可知滄州制

敕朱閣凝敞。便聯尤貴。劇選要任。庸得實才。以爾具官杜惟序。代閤忠規。蕃衍沈濟。服在近列。夙暮告虔。河朔之區。繕守完備。方事之總。擢委佺藩。悉心振職。謀無遺譖。與議歸美。達于予聞。特推寵章。超踐華局。弗遷他領之舊。益圖來譽之升。露服以行。足詭方郡。

郝元規可西京左藏庫副使知辰州制

敕郝元規。材秀膚敏。照機無帶。朱閣中殿。勤事有年。陝都而西。假節將命。糾讞詳簡。藹于予聞。進貳使聯。且付州任。矧辰陽之控。疊落在焉。綏徠荒梗。參責威愛。往念榮寄。懋哉不忘。

楊告可右諫議大夫知鄧州制

敕諫省華要。從古爲重。比來以位遇既顯。言責難專。故寵其器名。以宅良駿。雖不蒞職。要爲邇臣。具官楊告。慮敏以精。器適而濟。嚮煩所使。用觀其能。而漕引東南。輸入都內。歲有羨餉。役無淹期。飲予足食之術。

時乃析豪之效。僉質公議。應圖厥勞。俾升七誨之列。且藩三輔之邇。懋率忠力。光對寵靈。

李知和可西京左藏庫使制

敕李知和。性挺柔良。志安謹力。祇事宮闈。夙夜以須。服勤扃帶。左右逾恪。嚮闕功次。久待歲成。持從優除。式示蕃獎。離都豐帑。名要地崇。欽踐使華。仍總餘職。

張庚充開封推官制

敕。畿壘華翼。庶邦式瞻。幕廷參諏。乃僚是寄。具官某。礪淬敏行。發揮雅才。祛煩體遠。洞無盤錯。首公絜矩。樹爲風聲。率西之行。宣力彌劭。俾進京服。益光賓儀。左右長人。叶濟嘉績。往念襄擇。勉毋怠忘。

侯禧可節察推官制

敕侯禧。率勵追胥。捕格姦盜。全伍就執。賞目應條。改升資筵。參寵朱紱。往服襃擢。增最爾嘉。

尙書司封員外郎直集賢院麻溫其可開封府判官制

敕具官麻溫其。京劇居中。尹正須輔。必擇士彥。參舉政綱。以爾優學。麗辭清規。遠概早階。科等見重。俊游屬膺。官簿之勤。外樹藩條之最。稍遷省戶。還集書林。蘭聞彌薰。井德無改。宣資綠飾之美。俾贊浩繁之寄。

呂公綽可刑部員外郎制

敕呂公綽。風猷華劭。材力淹舉。務時儒術。邁訓義方。間從劇使。復專清貫。樹聲宣力。所往必諧。夫結課之

條。須最而陟。旣挺明效。亶符遴選。宜進司刑之曹。庸光滿歲之法。

袁易可比部員外郎制

敕袁易。踐揚朝路。肅給事經。向委守藩。式敏從政。滿年獻狀。論績當遷。聿圖勞勤。用秩勾比。揆榮恩報。懋哉不忘。

戚舜元可比部員外郎陸仲息可國子博士王逢士郭承祚竝可殿中丞李從夏侯錫竝可祕書丞制

敕戚舜元等。三歲之限。天道小成。朕課吏勞。稽法于此。以爾等文敏強濟。葉于官下。經營旅力。謹我詔條。事無度情。文不諉上。年比如令。朝次遞遷。省闈庠戶。芸簽盾局。資踐有等。褒進則同。各仍前蒞。益昭來譽。柳三接可大理寺丞制

敕柳三接。向榮儒第。久課吏勞。所知之薦。應條而至。銓覆有實。擢敘爲宜。往承卿曹。用啓榮序。陳紹孫寇仲溫竝可大理寺丞制

敕陳紹孫等。竝率勤恭。專幹煩監。如職而辦。閱歲宜遷。丞佐寺卿。勉罄賢瘁。

商泰可大理寺丞制

敕商泰。淹試吏勞。綽著材譽。監司廉狀。保薦交章。參贊課條。已事皆驗。俾遷卿屬。彌勛乃勸。

陳德之可大理寺丞制

敕陳德之以材自將所蒞時當監司廉狀保牘上聞以其幕府卹淹治目參實俾丞于理用獎宿官

李定柳灝可工部郎中制

敕三歲大比令甲有條覈實最科庸信吾賞以爾定秉尙淳固典學人官宣力幹裕華皓一志爾灝履吉林茂廉智自將美實積中暢于事業偕籍祕館參爲吏師或權節財賄以資仰給或班布恩詔倚成嘉靖灼有見效暴于攸司用置郎選式光考課竝仍事局益念懋功

鎮安節度判官黃炳可太于中允制

敕黃炳履操清劭局力精強歷贊侯藩休有嘉問所知之薦交章以聞宜升儲案用階榮序當念襲寵毋廢前勞

蔡竄梁堅竝可監察御史制

敕監察之任舉視行馬外事職峻望清匪才莫允以爾蔡竄志美謀劭安節而不流梁堅識精意果蹈道而能立竝試可有狀淹外累年比臺屬缺員邇列騰薦朕觀其所舉叶于攸聞咸易法冠之華俾增朝路之肅毋過毋怠時又爾中

鮮于亨可祕書丞制

敕鮮于亨素挺時幹。寢揚仕塗。最升有狀。文飾無害。攸司考課。年所如條。書省有丞。序進尤美。尙宰劇邑。勿懈爾勞。

辛若渝可衛少卿制

敕向科夫家。充籍和璧。明課衆寡。以列募科。能辦其事。吾必而賞。以若渝方守近輔。克稟朝規。悅勸趨力。樂從符伍。以狀自上。閱數應條。宜遷卿棘之副。以旌吏材之敏。

宋忠臣可水部郎中制

敕宋忠臣敏于爲政。恪于守公。不憚諸煩。汔有成績。三歲獻狀。申令著文。俾正郎曹。以旌吏課。益宣爾力。毋忝茂遷。

蔡襄知諫院制〔案〕襄知諫院在慶歷三年三月時祁方知制誥

敕蔡襄識詣冲遠。履業端方。含章立言。望古爲偶。而贊正祕籍。棲遲累年。懷國之寶。戢而未肆。朕方永惟闕政。思聞讜謀。增員諫署。高選才傑。是用振爾淹卹。光我簡求。進丞祕聯。參幹言責。噫。諍引之道。今昔異宜。蓋論高者虛而難從。議瑣者卑而無體。裁訂其要。俾可底行。往哉惟虔。欽遲中益。

奏舉人平江軍節度推官王罕可大理寺丞制

敕具官王罕。迺者深詔列位。竝舉所知。雖頗限吏資。而實取才劭。以爾早勤官牒。浹結歲勞。比籍幕籌之

能遠光縣綬之選。而名列薦狀。課在最條。宜循賞階。入備卿屬。修方永譽。以稱寵章。

奏舉人前權興州軍事推官樂富國可大理寺丞制

敕具官樂富國。夫舉吏之格。以監司爲先。蓋其試行能。察臧否。審于他部故也。惟爾上課比牒。薦名。皆荆曹之計臣。糾獄之專使。泊于郡將。濟之朝紳。保任一辭。鉤校符協。宜驛幕畫之最。俾預卿僚之選。

奏舉人前楚州團練推官蕭固可大理寺丞制

敕具官蕭固。朝廷謹保任之科。求才用之實。嚴乃最狀。委于銓衡。爾修辭策名。效智從政。頃以善畫。介于列藩。而準詔之臣。連章署行。參觀閭閻。式允褒嘉。宜備屬于卿曹。且勸能于吏啓。

奏舉人前平海軍節度推官知福州懷安縣李昭選可大理寺丞制

勅具官李昭選。繇絲銓條。擬戎介。墨以漢綬。宰於閩區。而薦能交章。覈課如詔。朝有面命。恩不容私。宜丞卿曹。用勸官最。

鎮南軍節度推官知袁州宜春縣廖宗禮可大理寺丞寺

勅具官廖宗禮。晷假賓釋。往紆縣綬。課無殿日。薦有連章。銓審以聞。旌疇有次。宜遷聽棘之屬。用廣甄材之路。

前鎮江軍節度推官知蘇州吳縣聶德一前蘄州廣濟縣令張保衡并可大理寺丞制

勅具官鼎德一等。咸以通經。備于補吏。或列藩奉檄。兼委于字氓。或大邑腰章。游較于異課。而行充薦牘。年及赦條。宜疇銓格之勞。俾率卿丞之職。勉欽并命。毋忽攸箴。

前邠州新平縣令裴愿可大理寺丞制

勅具官裴愿。早服吏資。薦循選格。勉勤縣譜。雖有薦章。銓簿以聞。賞科無廢。宜入丞于理署。且仲勸于宣成。

前江陵府佐司理參軍余貫可大理寺丞制

勅具官余貫。藝文中科。肅給將事。比參府掾。分幹理曹。獄無頗辭。致有連最。質于銓審。名在薦延。宜備刑卿之聯。且光材吏之舉。

光祿寺丞集賢校理趙宗道可大理寺丞制

勅具官趙宗道。夫銓審之最。著于甲令。所以育人材而旌職業也。以爾門緒華廡。機靈敏秀。早程賦札。遂預書林。自服鉛黃之勤。多分豕亥之謬。訖茲歲滿。嘉乃官成。宜易漢勳之聯。進丞理法之署。尚資是正。以對褒榮。

奏舉人縣令韋輔堯可大理寺丞制

勅具官韋輔堯。學古而官。庇身爲邑。政均疲俗。名在薦章。選格較勤。吏資應賞。俾丞卿法。用勸銓流。

刑部試到詳覆官縣令劉永錫可大理寺丞制

敕具官劉永錫。故事。上臺秋曹。覆天下辭案。凡置佐率屬。必先試而後命。亦以觀吏文。責最目也。以爾擢自縣邑。俾替坐曹。能服簡書之詳。且周星歲之限。恩有成例。賞不爾私。改丞理官。尙典刑局。

奏舉人前同州觀察推官張維師可大理寺丞制

敕具官張維師。早服吏銓。序參賓畫。舉贊名藩之重。實兼他部之勤。且有連章。稱宜厥職。載稽官簿。仍獲考年。俾改卿寮。以振才滯。首公絜矩。勉副所知。

刑部試到詳覆官司理參軍劉直可大理寺丞制

敕具官劉直。故事。天下具獄上書者。皆本曹置屬覆視而審覈之。將充其官。必試乃可。惟爾擢自州掾。隸于邦刑。紛披科條。檢結凡最。竭慮無懈。質歲有成。宜疇吏勤。進補卿寮。勉續成績。思稱茂恩。

奏舉人試祕書省校書郎前宿州司理參軍黃孝先可大理寺丞制

敕具官黃孝先。早服秀科。洊署勞課。始治郡獄。參飾吏文。訖無訾豐。多所澄雪。使臺陟狀。銓簿類能。宜入替于理官。且申勸于公路。

奏舉人前真定府司錄參軍焦盛可大理寺丞制

敕具官焦盛。經明服官。吏久隨調。始參綱掾。能督府郵。守將狀其廉端。州案中之慰薦。稽于銓審。應我賞

科俾改卿僚之華。勿孤士類之舉。

掄選人前永興軍節度推官知河南府長水縣事張昭文可大理寺丞制

敕。官張昭文。間命都銓。擇吏之勤廉者。假以部從事。而參宰劇邑。實有允令。圖其後勞。爾今來思。具質成課。既符信賞之目。宜服當遷之命。往丞聽棘。彌厲飲冰。

內制

除婉容張比封貴妃制〔案〕封貴妃事。仁宗本紀。在慶歷八年十二月。后妃傳。在皇祐初。

門下。朕聞王者始風。本乎妃德。天下內治。模厥人倫。咨擇邦媛之良。飪敷嬪壺之懿。茂推異數。誕布公言。婉容張氏。陶翕闢之和。生慶善之族。玉粹其度。淵覲爾衷。以阿保之法。自閑以圖史之誠。攸服先贊內職。叶升大猷。力蘋沼之至恭。襲珩佩之旋矩。禮以爲絢。謙不忘勞。用嘉冲徽。顯啓優渥。進膺綸翟之貴。參亞軒龍之華。於戲。謹于順承。陰教惟穆。勤乃輔佐。王化所經。爾其念夕。惕之虔。躬日休之裕。樛木之逮乎下。然後稱仁。彤管之紀其言。予以垂美。往席寵命。毋忘訓辭。可特進封貴妃。仍令所司擇日備禮册命。主者施行。

封寶壽公主制〔案〕宋史公主傳。寶壽係仁宗第十二女。此云第十三女。未詳孰是。

門下。朕聞自家所以型國。治內本乎先親。況天挺王姬。邦著封典。舉循厥舊。今也惟時。皇第十三女。儲光

嫠。躋。宵。順。坤。極。未。覽。古。而。知。教。故。在。姆。弗。勞。雖。尙。幼。而。好。仁。故。處。躬。惟。恪。德。範。已。就。褒。冊。難。稽。是。用。涓。選。休。辰。規。照。蕃。渥。順。格。景。風。之。懿。播。聞。禮。季。之。華。商。錫。嘉。名。護。成。淑。質。於。戲。周。推。車。服。之。異。漢。啓。脂。澤。之。榮。非。曰。親。私。繫。乎。治。體。無。替。前。習。更。竚。來。恩。

除張耆太子太師致仕加食邑實封制

門下。朕。寵。遇。舊。德。欽。揖。高。年。罔。勞。官。職。之。務。俾。逸。股。肱。之。老。特。申。沖。概。庸。厚。邦。風。具。官。張。耆。資。量。沈。雄。規。猷。隱。濟。被。遇。先。聖。宣。力。四。方。既。昭。元。戎。之。毅。遂。幹。中。樞。之。劇。竄。有。茂。伐。居。無。間。言。進。視。乾。台。彌。寵。師。節。肆。子。纂。紹。益。復。倚。成。入。則。參。勤。王。家。出。則。是。憲。方。國。能。守。其。貴。讓。省。乃。躬。固。將。繫。魁。壘。之。良。罄。謨。明。之。懿。竚。誨。前。席。須。績。景。鐘。遽。披。至。誠。願。還。所。事。勉。諭。已。悉。遜。執。不。回。且。念。大。臣。重。遠。雅。志。難。奪。與。其。屈。任。孰。若。便。安。宜。改。儲。師。之。華。聽。上。使。施。之。領。衍。其。爰。入。尊。以。朝。儀。於。戲。抗。請。辭。榮。推。恩。就。第。鎮。天。下。之。競。于。以。稱。賢。保。臣。道。之。終。茲。焉。有。體。勉。荷。殊。渥。恬。齋。太。和。毋。專。高。蹈。之。介。有。俟。悖。言。之。益。

除皇叔德文忠武軍節度使加食邑實封制

門下。朕。仰。紹。鴻。烈。惟。懷。永。圖。每。糾。宗。族。之。恩。疇。先。伯。叔。之。懿。用。推。厥。愛。以。展。予。親。具。官。德。文。道。與。粹。和。天。俾。忠。謹。有。言。而。踐。百。行。成。章。而。暢。四。支。早。建。將。牙。兼。穆。台。鉉。邦。洽。斯。譽。神。勞。以。祥。歲。艾。而。精。明。不。衰。爵。隆。而。侮。吝。彌。遠。比。詢。朝。論。已。啓。王。封。尙。圖。久。勞。更。膺。異。獎。改。疏。假。璧。之。奧。進。服。溫。貂。之。華。仍。廣。轅。轡。以。大。租。

入於戲。修人道之睦。我惟惇敘。閱天下之理。爾實老成。益美翰垣。參重宗稷。秉德陪義。是惟顯哉。

除皇兄允讓寧江軍節度使加食邑實封制

門下禮重祭饗。寵伯仲之國。詩標棠棣。廣親族之愛。稽古教睦。朕能行之。具官允讓。器令而固。志和而立。懿作休德。奮爲嘉猷。早秉中權之雄。復正大宗之領。協我公姓。光于前人。間侍郊宮。參獻彝璫。服攸箴而惟謹。攝爾儀而罔愆。向者已徇朝言。特疏王爵。載惟襁渥。尙慊成勞。俾視秩于台階。且仍華于將闔。優實多戶。併示隆恩。於戲武穆文昭。其流斯遠。元戎茂宰。注意所兼。爾其浚明日孜。蹈道時敏。欽助予治。不繼膚功。

除皇兄允弼武康軍節度使加食邑實封制

門下朕惟一二兄弟。屏翰吾家。每推骨肉之愛。以強本根之託。矧在邇屬。早休厥聲。適及剛辰。進膺異數。具官允弼。甚德而度。參仁以和。居貴而罔流心。訓恭而遠祇悔。間陪郊獻。佐庀宗司。抑抑攸儀。舉皆率履。綽綽斯裕。內無違言。成予敘親。時乃修職。比者雖疏王爵。未厭寵名。宜停後務之繁。俾領元戎之制。增食爰賦。兼實幹封。於戲磐石而宗。寄莫重焉。扞城于國。義莫先焉。可壯非猷。可順非迪。仍輟就藩之遠。姑隆綏族之恩。往惟懋哉。顯對嘉命。

除皇弟允良安德軍節度使加食邑實封制

門下堯惇茂族。於變是雍。周建懿親。時雍展愛。朕參式先憲。褒序吾宗。僉同公言。誕舉恩冊。具官允良。氣韶質美。憑信厚之餘。體和履順。遠冲孺之習。早經留務。常止上都。以爾考有叔父之尊。帝室之屏。助昭彝器。慶裕後昆。向嘉冢嫡之承。已疇王爵之顯。斷自予志。申付節施。因具官儀。衍實封社。於戲。古有謙訓。汝其念聞。夫寵不期驕。而驕從謙。不待益而益附。修也可以思永。慎也可以寡尤。務孝圖忠。欽服茲命。飭躬靖位。以卽而藩。

除皇弟允迪安靜軍節度使加食邑實封制

門下朕聞立愛莫先于親。繁支實庇其本。每念攸訓。匪伊異人。用推敦序之典。期光夾輔之體。具官允迪。承燾天祐。衍慶宸孚。舉動嚴方。趨覲閒敏。思長富貴之守。寢肄朝夕之虔。向爾使華。允穆公路。頃以王卿殂謝。予懷悼驚。念其堂構。眷深橋梓。維城有寄。墨經還朝。載隆近屬之恩。俾領中軍之節。仍增邑食。且實戶封。於戲。乃考之忠勛。四邦是式。乃兄之光寵。十乘有儀。爾偕厥榮。毋或茲忝。欽卽殊獎。祇勵遠猷。

除皇弟允良加功臣食邑實封制

門下朕率祖宗之常。謹郊廟之饗。迎日涓選。熏燎告成。衍三靈之歡豫。肆萬民之慶告。既飲其至。因資爾勞。矧一二兄弟之親。參陪夙夜之恪。宜緝恩典。以寵懿藩。具官允良。履尚詳華。機采明悟。世不忘于濟美。孝乃移于事君。王社以光。帥節云重。向因侍祀。彌見協恭。闐然陽氣之休。櫛如盛服之美。我禮尤具。惟神

克欽特緣。膳胙之頒。首篤棣跖之愛。進加功號。兼拓爰封。且詢中石之規。更增多戶之實。於戲。自天介祉。旣輯于上儀。爲國懋能。敢私于同姓。往祇異數。勤劬壯猷。

杜衍加食邑實封功臣制

門下。朕祇飭齋輅。躬款泰壇。昭事天明。交脩地察。佑升二后。賓延萬靈。昭鑒次于都甸。欽紫煇于霄極。越惟雋輔。相我盛容。方錄解嚴之勤。時先讓假之愆。川信賞典。以告治朝。具官杜衍。清明以和。諫達而敏。有罔伏之亮。奮于知恩。有含章之美。發于事業。向圖克祀之盛。允賴若時之庸。假節太庭。告謚慈祐。奉瑤冊而虔鞏。祕金鎮之邃嚴。而又率籲攸司。奉行故典。牲牲博膺。玉幣精純。接神明以歆馨。塞穹壤而凝祐。遂頒大慶。胥洽衆歡。永言皤髮之良。欽從屬車之至。職勞而賞。惟敏則功。宜增號表之榮。仍崇階等之貴。廣開厥邑。優實乃租。於戲。靈眷備成。恩章差沛。所期君臣有以相戒。休息有以無疆。熙其未明。瞭其未略。俾乂予治。聿暢爾。

賈昌朝加食邑實封君臣制

門下。朕昭事天地。哀佑祖宗。九州四海。畢來助祭。千乘萬騎。并據上儀。眷我輔臣。相惟元祀。乾紫營之升燎。肆王載之解嚴。差敍厥勞。疇先爾賞。具官賈昌朝。挺秀崧漢。儲精本元。撓之彌澄。宏德量于無際。汰焉不耗。植忠質以自強。台樞踐更。文武參式。自善祥之歲習。凡用度之日咨。問臨路朝。前遣鴻冊。實膺使節。

之重。往祕后祔之藏。至于入侍齋居。出陪奉引。官師象物。供帳無勞。成上帝之居歆。綿中區而敷慶。竣于大事。時乃協恭。是用著美號以表勳。敘崇階而峻等。卽邦進爵。衍食疏封。率爲寵章。式顯優數。於戲。祭而受祉。眇躬難乎獨饗。賞弗淹日。同體示乎仰成。益圖夙夜之虔。交修大小之務。靡否不替。有猷而爲。永孚天休。茂對嘉獎。

王貽永加食邑實封功臣制

門下。惟天祐德。惟辟事天。率三歲而合享。總六飛而出次。雖居有常處。用有定規。至于訪逮典彝。粉飾容采。眷吾近弼。預有勞焉。惟是圖功。亶無留賞。具官王貽永。行本和懿。謨函寅亮。公忠交奮。賢戚兩華。叶修對越之虔。參陪陟降之恪。事皆如素。人罔告勤。普羣望以懷柔。震萬祥而翕習。已敷鴻慶。遂策茂勳。嘉夙夜之方將。顧臣鄰之同底。是用益以寵號。冠于美名。拓井邑之故封。實租食之新數。於戲。神貽繁祉。旣惟做于兆人。朝論獎冊。遂敷施于有位。尙當念治之所由治。處休而勿自休。共守治平。滋懋丕績。

特授李德政加食邑實封保節功臣制

〔案〕德政係交趾郡王。

門下。朕躬執玉幣。祇見郊丘。率萬官以承序。職百神而有次。薦誠以德。蒙后皇之竝臨。推福爲恩。塞穹壤而偕抃。眷言列位。助藏上儀。內則相禮之虔。外則獻力之恪。用當飲至。均第有勞。具官李德政。秉心懿恭。執義光大。昭啓王社。妥安裔人。載甲令以輸忠。航貢品而綿險。一我尉候。保茲東南。屬欽柴之告成。前景

風以覃賞。爾乃作扞。時予不忘。宜益表功之華。俾旌守方之重。陪敦封邑。衍實幹租。於戲。天瑞神祺。紛流于中野。朝俞國霈。敷錫于列藩。尚膺典冊之榮。愈圖彝器之績。懋哉夙夜。永綏爾邦。

景文集卷三十二

內制

賜中書門下詔

敕中書門下。朕聞至治之世。天下向化。元凱共朝。不爲朋黨。房杜相濟。不爲比周。君明臣哲。垂榮無極。何其德之盛也。朕旰食宵衣。每用庶幾。思所取法。未知厥路。而承平之弊。澆競相蒙。姦隨法生。僞逐情動。假我王爵。樹爲私恩。所憎則同口共營。取一切之快。所善則併辭迭譽。希不次之遷。遂乃人務交遊。家爲激訐。至于陰開納賄之請。陽託薦賢之公。居下而圖柄臣。順非而動偷俗。附離交扇。流蕩忘還。更相援接。以沽聲譽。由是人士以行怪爲美。辭賦以訕上爲能。放肆異言。詆斥前聖。謹流羣口。虧紊髮倫。又頃正按察之名。謹推擇之選。俾將明命。以慰多方。而奉使不稱。繩愆過當。恣苛刻以搖羣怨。纖纖微以搆罪端。守倖則互責刻廉。令尉則更容伺察。上下疑貳。奏鞠交橫。未益治平之風。反成多辟之暴。向申勅戒。殊未奉行。朕疾夫爲國生事之徒。背公死黨之俗。推狂濟果。去簡成煩。況長吏者。務在全安。刺舉者。素有條禁。民如馭馬。安得駭驚。理猶亂繩。弗宜遽急。當求大中之順。漸致清淨之原。至于屬文之人。體要爲急。苟專非聖之論。寧免疑衆之誅。自今者。詭激邀名。浮薄連茹。用察以害良善。倚法而峻誅求。雷同私論。營罔朝聽。竝

委中書門下御史臺采察以聞。故當責其不悛。懲乃敗類。罰之無赦。令在必行。咨爾有司。咸體予意。故茲詔示。相宜知悉。

賜中書中明先帝賜文武臣七條戒州郡詔

勅中書門下。湯德至盛。著具儆之言。漢功方茂。下督責之詔。于時中外協念。以趣大康。朕顧眇躬。託王公之上。明弗能燭。數有未通。每念付畀之勤。治平之詔。日慎時惕。罔敢自安。庶臻至治。無差先烈。是以畿府州軍監縣之長。居常推擇。部分總督。屯邏之委。一皆僉求。亦冀羽翮參翔。腹背偕奮。手足迭扞。心膂獲寧。今乃聞郡邑庶官。未能稱職。紀律耗廢。真僞混淆。或自謂謹柔。旣難集事。或矜爲強濟。又匪恤人。或朝夕詭激。而望改遷。或歲月因循。以濟貪冒。或廣飾廚傳。掩簠簋之瀆。或曲奉監司。逃簡書之劾。緣令作詐。倚公殖私。頃者。以邊鄙未寧。師旅四出。旣不獲已。調發于民。隨輒戒勅。勿令煩擾。然而斗粟未漕。民有一鍾之費。匹帛暫輸。吏有數縑之入。與我共此。所望責成。爲上斂怨。任將安寄。以至盜賊屯結。公行劫掠。上下畏懦。弗能擒討。驚騷閭里。盜弄庫兵。士非素習之專。患無豫防之禁。永言茲事。寧忘朕懷。跡夫弊生。實始官濫。恭以先皇帝欽容明翼。達見治宜。親著三條。垂戒百執。每辭去之日。普令拜賜。凡從政于外。舉得奉行。羣臣亦有刊石傳文。題屏示坐。朕以爲旣能尊戴。曷若踐言。幸獲親聞。便當立事。其外任文武臣僚等。自今以來。務革前失。聿新後圖。以聖考七條。更相誨勗。置朕此訓。亦復研尋。爲仁由已。取則何遠。上尊先

甲之諭。次謹申命之虔。攝爾頽綱。綴我漏目。使美課歲茂。善狀日升。則隆名顯秩。朕將何吝。必若紆宥弗禁。農晦辛菜。論報誣冤。徭役重困。不恤士伍。不訓武經。邦有明科。朕當必罰。咨爾有衆。無謂食言。故茲詔示。想宜知悉。

賜北京留守資政殿學士工部尚書程琳并知相州宣徽南院使保靜軍節度使王德用撫問詔

勅程琳等。卿謀略沉濟。忠款精強。容言守屏。方倚風力。而邊州上奏。屯旅鞠凶。雖遣招懷。亦資防遏。綏訓士衆。犄角封陲。明爲指蹤。以俟安堵。

賜新除龍圖閣直學士知成德軍府事田況詔

敕田況。省所奏。乞罷龍圖閣直學士。只以舊職知成德軍府事。及有河北經度機密事件。欲乞暫乘遞馬赴闕入見。敷奏事具悉。卿有仲舒之文。翁歸之武。毅然施政。萬夫所觀。故易以近職。殿于大邦。克埒方略。寢擔邊陲。遽露至懷。願仍舊秩。擇才而授。羣議所同。往諸官守。毋或勤讓。比又邊臣失御。戍伍卽擒。容惟都會。尤須鎮輯。特蠲入覲。便卽之藩。當體眷期。益奮忠力。

賜任布詔

卿年德兼艾。憂勤是力。向者憫煩機劇。是用許三城之行。雖使齋神。亦資坐鎮。何所謙避。卽以將老爲言。惻于朕襟。似未深諒。且洪樞之佐。黃髮之良。非與庶工。輕于得謝。宜安吉履。第守奧藩。臻蕃福祚。以副衡

倚。

賜知鄆州宋某詔

勅宋某。省所進奉阿膠一合。重五十兩。緋羅夾複裏事。具悉。膠品之貴。阿井爲珍。卿適茲守土。勤于作貢。順時熬液。凝劑甘新。恪稟襲規。參旅方物。區產云美。料治所須。推處厥誠。嘉歎何已。故茲詔示。想宜知悉。賜知審刑院事丁度詔二首

勅。朕念細人無良。庶獄未措。每于決事。憫然疚懷。卿鑑融機敏。駭無停奏。平疑錯枉。洞得其情。乘此長贏。託夫論執。況海區甚廣。按訊日來。能致少閒。固亮勤職。願紀直筆。彌悉至誠。歎悅所兼。不忘于意。仍依奏宣付史館。

勅丁度。省所奏。今月二十五日已前送下公案。竝已約法斷絕了畢。別無見在文案事。具悉。嚮以官師既衆。賅冒相尋。廉刻之奏。猥騰論報之文。四出。每加申勅。無及細苛。卿有服念之勞。簡孚之謹。鞠讞雖畏。報下無留。句歲之中。停奏于冊。削章歸美。宣力有勞。嘉其悉心之功。成我措刑之漸。載惟歎尙。弗忘于懷。仍依奏宣付史館。故茲獎諭。想宜知悉。

賜杜衍乞退第三表不允斷來章詔

省上三表。乞保餘齡。授以散秩事。具悉。卿有隨會之忠。任隗之正。易之甘節。洪範之有猷。是以叶都公議。

付俾樞管。方事之總。勤勞王家。夫推之同心。不容有間。久于其任。乃克懋功。游閱奏函。殊乖茲指。且卿屬疾雖屢。揚休不衰。魁然華皓。爲朝耆碩。用及四載。便欲引身。徇高全亮。是安沖養。使天下之論。謂朕輕于進退。貳于眷毗。得無傳聞重吾之不德也。況謀謨未究。方當匪躬。邊鄙云騷。詎獲高枕。昭體大誼。卽斷來章。定志宿官。熙我不績。所請宜不允。

賜權知開封府吳育乞解京府不允詔

敕吳育。省所上表。乞解京府。授側近一郡事。具悉。卿志力開濟。飾之文敏。京轂操決。號爲詳明。庶邦是則。緊乃之寄。胡遽披請。願去浩繁。況具獄報論。卽情甚細。從宜報據。在職當言。雖不果從。要之有守。宜祛嫌慮。以副眷期。懋哉夙夜。式永休譽。所乞宜不允。故茲詔示。想宜知悉。

賜章得象讓職第三表不允斷來章手詔

省三上表。乞解重柄事。具悉。朕聞君爲元首。臣作股肱。相須爲體。是能濟。朕荷祖宗之構。臨制萬方。不明不敏。每用自愧。賴天之福。寓內以寧。惟一二柄臣。輔其不逮。丕承執競。以克厥庸。卿毗佐七年。終始一節。鎮浮以雅。伐叛以謀。載其清靜。紓我勞疾。俾朝威主惠。震疊光明。時乃之功。冀懋台德。今確徇冲尚。引避宰司。求申所懷。未喻前答。永言大誼。當存至公。何嫌何疑。自期獨往。若然。則元首之眷。股肱之司。得無用違。以忝成訓。毋或封執。容適大中。卽斷後章。式副朕意。所請宜不允。

賜田況讓識不允詔

敕田況省所奏。蒙恩授起居舍人。陳讓事具悉。向有邊臣無良。戍伍亂挺。殺害官吏。驚騷里閭。懼而歸命。罪乃所得。卿適往臨撫。善處便宜。蘊夷渠惡。分北支黨。曠然按堵。後無餘災。嘉此成效。已令進秩。何循謙執。乃乞讓還。賞惟值功。朝靡收汗。當祇厥命。方職爾勞。所讓宜不允。故茲詔示。想宜知悉。

賜王貽永生日詔

譜閭華勳。風猷沈力。親則副馬。幹惟中樞。帝錫予佐。實表賢運。仲月之魄。厥生記辰。世祉蕃昌。家宗歡籲。就頒牢飲。茲異寵光。俾壽且祺。敷暢助績。今賜卿生日羊酒米麪等。

賜韓琦生日詔

謀府強濟。忠慨沈詳。幹予樞筦。允穆王路。時惟生日。有煥慶宗。家情美于高門。邦論寵其名世。特頒多物。庸示褒懷。牽釀有常。體榮兼列。合而姻族。續爾期頤。今賜卿生日羊酒米麪等。具如別錄。至可領也。

賜杜衍生日詔

思皇舊輔。對我盛期。遠跡名世之來。顯符賚弼之比。予治云洽。乃功不忘。克生紀辰。背慶參覲。雖緣顧復之盛。方樂艾耆之華。用遣使人。就頒牢品。既昭恩眷。且及爾私。

賜宰臣章得象生日詔

帝賚茂宰。與朕同心。翕受九德。修明百度。享期賢運。交相爲華。今茲誕日。固有常禮。饗人酒正。各俾往頒。一以申祝。永年。一以助樂。私闡。錫爾難老。副我眷毗。

賜宰臣文彥博生日詔

崧極憑粹。實啓周朝。昂躋融照。是生漢輔。眷我良弼。挺厥世祥。式倚爾才。以佐台德。日惟載育。禮厚有初。俾洽宗黨之歡。用頒羞飲之具。旣推異數。具熾茂齡。

賜參知政事賈昌朝生日詔

挺秀民鬢。協美賢運。盧合著蔡。道侔絲繩。參裨暇假。穆我元化。今茲誕日。尤驗世祥。況稱壽親闈。交慶私室。宜頒多物。以助胥歡。仍續永年之祉。圖終亮采之績。體予褒賜。卽當祇膺。

賜參知政事范仲淹生日詔

八月二十九日生

蔚有雅才。生此王國。參幹萬務。朕與嘉之。載誕及辰。糾族胥慶。宜有優禮。以重邇臣。旣昭名世之顯。兼資式喜之具。申續難老。滋奮大猷。

賜樞密院副使晏殊生日羊酒米麪詔二首

進止方重。謀猶粹果。鑒定台綽。參決樞華。民瞻國論。浩然胥協。天挺俊乂。符我治平。知及誕之辰。懷顧復之慶。宗戚歡祝。宴喜相存。特此頒分。以重褒眷。今賜卿生日羊酒米麪等。具如別錄。至可領也。

碩學冠時。清心照理。昔侍帷幄。在衛翼以勤勞。擢武樞機。當論議而沈正。載聽惟崧之頌。適臨生甫之辰。俾永屆于遐齡。用特頒于禮餼。膺茲寵異。諒體眷懷。

賜樞密副使張士遜生日羊酒米麴詔

武職天樞。同寅相室。忠勞允著。廣益居多。屬茲生育之辰。特舉匪頒之典。式介眉壽。永佇嘉猷。

賜陝西四路沿邊經略招討都部署司敕

朕卹軍旅之苦。寵邊陲之良。事從優寬。情無避愛。至于常愆細過。竝許功除。煩文苛法。罕由吏議。昨滕宗諒。張亢。竝緣事任。合給公用庫錢。俾其宴享賓僚。犒飭軍伍。而乃用度無藝。簿領失防。陽託貨營。潛有牟人。攸司言上。遣使卽推。如聞逮繫。頗多鞠劾。彌廣本其冗費。寧足深誅。已罷案窮。悉令原貸。其滕宗諒等。止免一官。量降差遣。雖屈吾法。期慰士心。且夫盡用市租。美推趙將。來從我取。誼表漢臣。每慕前風。思全大體。尙慮諸道帥守。便以茲事爲懲。或損狹餼率。或裁量藥餌。苟存畏避。謂免譏彈。胡益至公。亦非朕意。但當循經費之式。去自潤之私。取仰于官。均惠于衆。由茲底績。夫何閒然。安節坦懷。毋或疑憚。

賜南平王李德政歷日詔

按即交趾郡王。

頒歷之義。以初爲常。俾一天下之歸。用謹人時之授。以卿列壤南裔。率職本朝。宣我恩化。慰彼黎庶。每屬歲元之會。必榮廟朔之藏。朕亦推處禮祥。裁輔舒慘。申命太史。分次左方。宜按象以奉行。表布和之胥泊。

特茲馳錫，勿怠欽承。

